



ル 5  
2537  
9



門儿名 5  
號 2537  
卷 20-9

日下舊聞卷十六

城市七 南城上



正東坊自正陽門外東河沿至崇文門外西河沿八牌

四十舖有蕭公堂崇真觀天慶寺慈源寺清化寺西三

里河東三里河蘆葦園 五城坊巷備備集

天壇周十里內有園丘神樂觀天師府犧牲所在正陽

門外永定門內街東 同上

天壇在正陽門之左永樂十八年建繚以垣墻周迴九

里十三步初遵洪武合祀天地之制稱為天地壇後既

分祀乃專稱天壇 春明夢餘錄

嘉靖九年正月吏科都給事中夏言請更定郊祀言國

家合祀天地于南郊又為大祀殿而屋之設主其中弗

應經義言者祀天于圜丘祭地于方丘圜丘者南郊地上之丘丘圜而高以象天也方丘者北郊澤中之丘丘方而下以象地也南郊之壇曰泰壇以之燔柴北郊之坎曰泰圻以之瘞埋此古之制也是故兆于南郊就陽之義也瘞于北郊卽陰之象也此分祭天地各正其所凡以順天地之性審陰陽之位也况壇于南郊雖以就陽亦因高之義坎于北郊雖以就陰亦因下之義豈有崇樹棟宇擬之人道哉乞勅多官集議以求至當上嘉之

國朝典彙

詔博采公議主分祭者昌國公張鶴齡定國公徐延德懷寧侯孫瑛瑞安侯王橋駙馬鄔景和謝詔安仁伯王桓玉田伯蔣榮慶陽伯夏臣崇善伯王清都督夏助右都御史汪鉉府尹黎奭府丞黃鍾中允廖道南編修程文德給事中夏言蔡經張潤身李仁王聘田秋周祚陳守愚高金趙漢臣李鳳來戴儒孫應奎御史王繼禮喻希禮陰汝登郭弘化周禕徐淮虞守愚倪緝梁尙德陸琳李循義主事宋錦李欽昊治中汪登通判陳邦傅楊承祺主紳劉初推官江文中經歷陳琬冷宗元郭鳳張居仁劉秉仁韓義都事楊木李光祚知事胡蘭照磨李俊張霑檢校南鉦兵馬指揮畢成胡綱劉倫副指揮何守安牛進德朱哲張光祐王瑤陳謙周侃郭本端詹垣馮錫顧言廖長倫劉紹宗鄧文隆宋秀祝世亨吏目戴鑑馬昂張鉞凡八十二人主分祭而以成憲及時未可爲言者平江伯陳圭大學士張璉翟鑾侍郎董玘張雲

臣陳洪謨聞淵副都御史唐龍會都御史李如圭通政使張瓚卿黃宗明曾直少卿林有孚戴時宗先光史道寺丞周鳳鳴簡霄朱昭陳授葉松何鍾陳雲章葉廷芳彭黥修撰龔用卿編修張星給事中王守御史許廷桂張惟恕盧問之傅漢臣謝蘭寺正陸鰲王天民寺副王鴻漸林士鳳朱節胡湘評事陳經應杲吳壩孫裕戴呼余斐龔治司務劉贊襄馬顯主簿周文定都事陳貴韓勛典簿宋文熹陳琅署正宋鈞袁煥蒲敏元邊備署丞李繼元况道余定李儼劉壽李珏丁應南張夢徵楊茂深羅其賓陳珮秦學書監事楊臣秦昌勝董檜馬圖劉鏜鄭時明劉睿徐芳張傑鄒儒李瑞陽要秀吳冕丁如紀袁汝霖凡八十四人主分祭而以山川壇爲方丘者

尚書李瓚編修歐陽德歐陽衢給事中魏良弼御史傅炯余鈞員外郎余光祉行人司正邊彥駱右司副劉守良行人李遂王禎傅學禮秦鰲方太和沈謐周汝員柯喬孫世祐李實莊尹賓田濡蔡震畦華原家曾約等凡二十六人主合祭而未嘗以古禮爲非者尚書方獻夫李承勛梁材許讚章拯侍郎徐縉蔣瑤蘇民卿葛浩詹事霍韜顧鼎臣通政宋滄陳經叅議劉繼德孫檜劉日乾卿魏校庶子穆孔暉論德彭澤贊善林文俊蔡昂學士張潮吳惠席春許成名修撰倫以訓姚涑三用賓編修張袞楊維傑徐階祭酒許誥司業林時給事中王汝梅趙廷瑞曾仲魁董進第陳侃御史譚纘王袞陳講王道范安王杲趙兌吳麟士翺葉照朱觀方遠廖自冕

郎中劉序李默鄧尙義王道王松范伸劉從學黃瓚史  
麟許繼宋銳吳檄盧襄吳縉華鑰黃禎張經王大化盧  
蕙榮察汪堅易鑿張瑤姚世儒閻溥陳文譽劉佐侯緘  
甘爲霖丁洪專純汪漢金中夫員外郎張廷馮世雍李  
世臣王激王三省吳冲寇天與陳良策廖雲龍伍餘福  
屠倬王莘郭田王旒呂顯張羽李瑜趙葉場鏞貢澄張  
邦教余述張淑郁山主事楊麒全徹緒顧陽和吳允祿  
任瀚鄭汴汪居安馬坤鄭琬黃潤江滙屠楷陳大珊曾  
世昌苗汝霖徐子貞熊汲何鰲趙時春王學益王應檟  
徐官駱顯傳好禮汪以達蔡子舉李喬陳貫諸傑張臬  
毛衢賈名無陳耀朱子和蘇民夏玉林陳箎程綬皆忘  
人施昱謝紘郭宗皇王士俊林瓊康世隆查懋先諸邦

憲李翔郭秉忠高仲嗣陸時雍張參王鈞馮冠龔輦中  
書舍人郭俊司務張國紀高臣李克中張鵬吳道南李  
槃于喬張仲良周紳蘇民照磨丁律檢校宋斌張崑監  
丞徐炳典簿鄧祀博士王廷臣林文卿王昂蘇璞王全  
章助教魏琦陳謨陳禧金周陳琦薛僑譚諫林思誠范  
震臣李邦祥學正房堅任冕蔡奇范儒汪吧林文林邦  
望學錄李賓趙誌陳界彭元陽典多曹鳳翔凡二百六  
人無可否者英國公張崙等一百九十八人嘉靖祀典  
按郊祀分合時議異同姓名可見者三百九  
十八人國史所不能具載因備書之蓋內外  
小臣咸得與焉亦以見當日詢之廣也  
五月作園丘于天地壇稍北爲皇穹宇國知

園丘第一層壇濶七丈高八尺一寸四出陛正南陛濶九尺五寸九級東西北面陛俱濶八尺一寸九級壇面及壇脚用琉璃闌干第二層壇面周圍俱濶二丈五尺高八尺一寸正南陛一丈二尺五寸九級東西北面陛俱一丈一尺九寸五分九級壇面及壇脚用琉璃磚砌四面用琉璃闌干墼去壇一十五丈高八尺一寸用磚砌正南靈星門三座中門濶一丈二尺五寸左門濶一丈一尺五寸五分右門東面靈星門濶九尺五寸北面西面尺寸同燎壇一座在墼外東南內地高九尺濶七尺上開南出戶壇脚東西南三面設陛周圍外墻去墼一十五丈正南靈星門三座中門濶一丈九尺五寸門外正甬道濶丈尺同左門濶一丈二尺五寸門外左甬

道丈尺同右門濶一丈一尺九寸五分門外右甬道丈尺同東西北靈星門濶一丈一尺九寸五分甬道丈尺同存心錄

禮臣言園丘之制大明集禮壇上成濶五丈存心錄則第一層壇濶七丈集禮二成濶七丈存心錄則第二層壇面周圍俱濶二丈五尺蓋集禮之二成即存心錄之一層存心錄之二成即集禮之一成矣臣等無所適從潤色參詳是在皇上裁定奉旨園丘第一層徑濶五丈九尺高九尺二層徑一十丈五尺三層徑二十二丈俱高八尺一寸地面四方漸墊起五尺

嘉靖祀典

園丘外圍方墻門四南曰昭亨東曰泰元西曰廣利北曰成貞內靈星門南門外東南砌綠磁燎爐傍毛血池

西南望燈臺長竿懸大燈外靈星門南門外左設具服  
臺東門外建神庫神厨祭器庫宰牲亭北門外正北建  
泰神殿後改爲皇穹宇藏上帝太祖之神版龔以兩廡  
藏從祀之神牌又西爲鑾駕庫又西爲犧牲所北爲神  
樂觀成貞門外爲齋宮迤西爲壇門 春明夢餘錄  
皇天上帝正位南向太祖配位西向東一壇大明之神  
西一壇夜明之神東二壇二十八宿之神西二壇雲師  
雨師風師雷師之神 嘉靖祀典

圜丘第二層上設大明星辰位居東夜明太歲位居西  
內壝東設風雲雷雨師位天下神祇壇在外壝之內 存  
心錄

昊天上帝配帝位版長二尺五寸濶五寸厚一尺一寸跌高

五寸黃質金字大明之神金地祿書夜明之神黃地素  
書五星二十八宿周天星辰之神俱綠地金字雲師雨  
師風師雷師之神俱丹漆金書 嘉靖祀典

永樂十八年北京天地壇成每歲合祀洪熙元年奉太  
祖高皇帝太宗文皇帝同配享嘉靖九年勅建圜丘于  
大祀殿之南每冬至祀天以大明夜明星辰雲雨風雷  
從祀建方澤于安定門外每歲夏至祀地以五岳五鎮  
四海四瀆陵寢諸山從祀俱止奉太祖一位配享而罷  
太宗之配其大祀殿則以孟春上辛日行祈穀祭奉太  
祖太宗同配十年又改以啓蟄日行祈穀禮于圜丘仍  
止奉太祖一位配享十七年秋九月詔舉明堂大享禮  
于大內之元極寶殿奉睿宗獻皇帝配享元極寶殿卽

舊欽安殿也是冬十一月上皇天上帝尊號十八年春  
行祈穀禮于元極寶殿不奉配二十四年拆大祀殿改  
建大享殿命禮部歲用季秋行大享殿禮隨又命仍暫  
行于元極寶殿隆慶元年詔罷祈穀大享二祭復元極  
寶殿仍名欽安殿而天地則分祀如世宗所更定云  
太

嘉靖園丘琉璃闌干詔用青色

嘉靖禮典

唐時明堂制度其宇上圓覆以清陽玉葉清陽色也玉  
葉亦瓦之類今大享殿及園丘闌干皆用回青瓦亦清  
陽玉葉之類唐每郊祀啓南門灑其樞用脂百斛今都  
城南門亦閉不開惟郊祀駕出方啓穀城山房筆塵  
嘉靖十三年二月奉旨園丘方澤今後稱天壇地壇

萬曆十三年四月十七日上以天旱禱于郊壇白宮中  
步行而出禱畢仍步還宮纂五編

蔡羽郊壇詩輦道風清碧野平紫煙常自鎖南城行  
宮歲幸乘龍近仙侶朝來學鳳鳴小殿沉香金氣鬱  
園丘芳草玉華清祠官記得天行處萬燭光中候珮

聲林蔭集

黎民表雨後經天壇沙河作平沙雨濕草茸茸白玉  
高壇紫翠重馬上行人看不厭石廊流水遶疎松  
瑤  
石山房集

馮琦恭陪聖駕步禱南郊紀事詩龍虎新軍罷勾陳  
御路開紅塵都不掃留待雨師來北海集



祈穀壇大亨殿卽大祀殿也永樂十八年建合祀天地于此其制十二楹中四楹飾以金餘施三采正中作石臺設上帝皇祇神座于其上殿前爲東西廡三十二楹正南爲大祀門六楹接以步廡與殿通殿後爲庫六楹以貯神御之物名曰天庫皆覆以黃琉璃其後大殿易以青琉璃瓦壇之後樹以松栢外墻東南鑿池凡二十區冬月伐冰藏凌陰以供夏秋祭祀之用至嘉靖二十一年撤大祀殿擬古明堂名曰大亨每春行祈穀禮隆慶元年禮官言先農之祭卽祈穀遺意宜罷祈穀於先農壇行事大亨禮亦宜罷詔可至崇禎十四年正月上辛復行祈穀禮十五年正月上辛卽在朔日禮部以朝賀不便請改十一日中辛得旨於中辛日行禮春朔後

餘錄

齋宮在園丘之西前正殿後寢殿傍有浴室四圍墻以深池環之東西懸太和鐘每郊祀候駕起則鐘聲作登壇則止禮畢升駕又聲之同上

神樂觀在天壇內之西設提點知觀教習樂舞生內有太和殿遇祭則先期演樂於此同上

李夢陽郊觀齋居東邊喬二太常作人口過仙院青霞縹緲分碧回瑤澤草紅綻藥宮雲獨處依松樹清齋對鶴群桃源知並入惆悵不逢君空同集

犧牲所建于神樂觀之南東北爲司牲祠舊制歲以十月朔旦駕臨親闕以後每夕輪一大臣視之蓋自五府及吏戶禮兵工五部通政翰林堂上官之不司刑者

皆與焉凡兔房鹿檻羊機牛枋猪圈周行歷視出入皆  
騎卒火甲人等護衛每夕鐘定人靜乃出至中宵始回  
城門起鑰以入次早復命用騎卒自宣德年始  
春明夢餘錄

泰元門東有崇雩壇為制一成東為神庫嘉靖中以孟  
夏後祭天禱雨  
同上

雩壇止去地一級四圍用爐鼎四壇面用爐鼎二比圍  
丘減四分之一  
嘉靖祀典

天壇之北藥王廟武清侯李誠銘立也左墀碑文恭順  
侯吳惟英書也  
帝京景物畧

魚藻池在崇文門外西南俗呼曰金魚池畜養朱魚以  
供市易都人入夏至端午結蓬列肆狂歌轟飲于穢流

之上以為愉快燕都遊覽志

金故有魚藻池舊志云池上有殿榜以瑤池殿之址今  
不可尋矣居人界池為塘植柳覆之歲種金魚以為業  
池陰一帶園亭甚多南坻天壇一望空濶每端午日走  
馬于此  
帝京景物畧

天慶寺原遼之永泰寺金大安中兵毀元世祖至元壬  
申重建明宣德中重修後有高閣可望天壇僧舍有李  
龍眠畫羅漢十六軸  
春明夢餘錄

天慶寺碑至元九年學士王恽撰并書  
同上

天慶寺僧舍有雅致亭  
燕百集

重慶塞英撰文禮部員外郎錢唐吳謙書其一嘉靖乙

丑建極殿大學士華亭徐階作記 行國錄

馬祖常天慶寺納涼聯句槐屋夏陰繁石池暑氣清  
高堂瞰福田邃宇依王城午磬梵唄集夜廊酥燈明  
龕經鬱金字壁礎承丹楹寂寂鶴棲罽宛宛燕穿榮  
露葵炫晝艷霞藥敷陽英境闢便靜室心古樂高情  
逍遙祇園賞迤邐廬社盟山枕籍雲澗水簾凝水輕  
飯盃給香積袈裟褫華纓海圖岩壑拆天樂音聲鏗  
荔墻護筠粉桐甃沉榴瓔共忻朋簪合敢謂詞鋒并  
睥睨荒草棘橫縱按林荆幽尋掘塵鞅雅淡忘飛觥  
鄙哉河朔飲投幘得世名 石川集

袁梅記至治三年二月甲寅魯國大長公主集中書  
議事執政官翰林集賢成均之在位者悉會于南城

之天慶寺命秘書監丞李某爲之主其王府僚窳悉  
以佐執事邊豆靜嘉尊竿潔清酒不強飲簪珮雜錯  
水陸畢奏各執禮盡歡以承飫賜而莫敢自恣酒闌  
出心畫若干卷命隨其所能俾識于後禮成復命能  
文辭者叙其歲月以昭示來世竊嘗聞之五經之傳  
左國是先女史之訓有取于繪畫將以正其視聽絕  
其念慮誠不以五采之可接而爲之也先王以房中  
之歌達于上下而草木蟲魚之纖細因物以喻意觀  
文以鑒古審時知變其謹于朝夕者盡矣至于宮室  
有圖則知夫禮之不可僭溝洫田野則知夫民生之  
日勞朝覲贊享冕服樂懸詳其儀而慎別之亦將以  
寓其儆戒之道則是魯國之所以襲藏而躬玩之者

誠有得夫五經之深意者豈若嗜奇侈聞之士爲耳目計哉河水之精上爲天漢昭回萬物繭雲興而英露集也吾知練細之積寶氣旁達占候者必於是乎得之泰定元年正月

清容居士集

蹇英重修天慶寺碑畧距城南三里河之濱曰魏村社其地幽曠闕寂林木叢茂有古刹曰天慶其創始不可考宣德中僧德誌仍其故址更新之建大殿禪堂齋堂丈室以次而成天順戊寅十月或請于朝仍賜額曰天慶寺

吉金貞石志

慈源寺成化二年指揮朱善建

帝京景物畧

圓覺寺亦在魏村社明景泰中所建也有嘉靖四十二年重修碑記雲南道御史趙鏗撰文行國錄

金井在府南魏村社

明一統志

姚彬關王廟俗傳吳將姚彬盜關公馬被獲強不屈斃塑縛彬像公戎服作色左顧彬彬及面色不屈尙將七人怒視彬縛彬者仰公顏色而受命馬回望公其色歎沫人曰隋時像也

帝京景物畧

三里河元時名文明河接通惠河爲漕儲運道今鐵關尙存

春明夢餘錄

漕運總兵官都督楊茂上言京城南原有三里河直通張家灣煙郭橋自橋往西踰濬深濶二十餘里卻將煙郭木橋改作弔橋糧船到彼灣泊可免漂流之患若將此河濬深直至三里河作平水壩三四截于內置扁淺剝船令運船由此盤壩以達京師歲可省車脚數百萬

成化七年十月戶部尚書楊鼎工部侍郎喬毅上浚河事宜上命同漕運叅將袁佑踏勘得城南三里河至張家灣運河口袤延六十里舊無河源正統年間因修城濠作壩畜水慮恐雨多水溢故於陽橋東南低窪處開正通濠口以泄其水始有三里河名自濠口三里至八里莊始按渾河舊渠兩岸多人家廬舍墳墓流向十里迤南全以舊河流入張家灣白河其水深處止有二三尺淺處一尺餘濶處僅丈餘窄處未及一丈又有走沙天旱則淤壅淺澀雨澇則漫散衝突勢不易開憲宗實錄

大通橋去通州四十里地形高通州五丈置十閘方可

行舟三里河在天地壇前去通州五十里形高通州一丈九尺置二閘便可行舟但有一二走沙耳病逸漫

重建三里河橋碑在橋西鐵山寺碑建于正德十二年翰林院修撰江陰周叙撰文鐵山寺僧宗洪號也析津日記

周叙重修三里河橋記都城迤南有河焉乃隍水之枝流也河之上有橋橋之名曰三里其始創自天順間歷歲既久土崩石泐而往來乘載者病焉時有坊間善士戴通者欲為改作慮其費不貲功未易舉因與僧宗洪號鐵山者謀之廣為募緣不數月而集銀兩千一百七十有奇撤故橋降七尺以為基高十四尺有奇視舊加四之一衡二十有四尺視舊加六之

一縱四十尺視舊加六之一益墁石三十尺有奇視舊加三之一石欄板視舊加三之一石欄柱視舊加四之一橋之西東各窾三尺增築砥平衝皆四十尺有奇其東之縱三十尺西之縱六十有二尺橋之北南作耳橋者三一瞰乎寺之南泉一拱乎巷之鞭子一揖乎街之半邊不惟達是橋之衝路抑且殺河之勢而闕流之淤也延袤共七百尺有奇越五月而工成時正德十二年丁丑

吉金貞石志

正陽門外東偏有古三里河一道東有南泉寺西有玉泉庵至今基下俱有泉脉由三里河繞出慈源寺八里莊五箕花園一帶直抵張家灣煙墩港地勢低下故道俱存冬夏水脉不竭見今天壇北蘆葦圍草場九條巷

其地下者俱河身也高者卽舊馬頭明白易見不假經畫稍加修治卽可復也但附近勢家莊厝故成化六年楊茂雖嘗建議而不敢盡言但請置壩而已後亦竟沮不行成化十二年亦踏勘而勢家賄通欽天監以爲地居京師子午方位爲說不知三里河乃在都城巽巳實非子午方也今誠按此修濬則公私大船俱可直抵三里河不但便船刺而已

桂文襄公奏議

按張爵紀五城坊巷衢衝南城正東坊有西三里河東三里河蘆葦園崇南坊則有南河漕于家灣運所纜竿市又有三轉橋紀家橋板橋雙馬莊八里莊十里河皆三里河入張家灣故道今其名雖存而深谷爲陵遺跡

漸不可考矣

三里河之故道已成陸矣然時雨則停潦泱泱然河也武清侯李公疏之入園中園遂以水勝可汎舟周廊過亭其東梅花亭砌亭爲瓣五鏤爲門爲牕繪爲壁甃爲地范爲器其形皆以梅

帝京景物畧

劉同升李園小集詩小橋行過柳溪灣爲訪園亭竟

日閒出郭已知依綠水登樓更喜見青山寒泉落木

疑丘壑瘦馬深衣自往還剩采東籬尋舊約君應無

夢到塵寰

兩朝遺詩

正陽門外三里河東之明因寺有李伯時渡海尊者卷不知何年爲人賺去存者贗本而僧不知也萬曆二十九年紫栢大師自五臺來夜夢十六僧請挂瓶鉢亭午

有負巨軸售者軸凡十六貫休所畫羅漢也師歎異購

之各係以贊傳寺中天啓二年董宗伯其昌過此書佛

成道記宗伯三十年前見紫栢此寺中索書成道記至

此踐前諾也今榻石置僧寮左壁

帝京景物畧

僧貫休姓姜字德隱婺蘭谿人入兩川蜀王衍賜紫衣

號禪月大師畫羅漢像最著蜀王取其本納之宮中設

香案登崇奉累月乃付翰苑文學士歐陽炳作歌以稱

之羅漢狀貌古野殊不類世間所傳豐頤感額深目大

鼻或巨額槁項黝然若貊豨見者無不駭矚自謂得之

夢中疑其托是以神之

宣和畫譜

禪月大師居定水禪院嘗夢游他國於岩阿石室親見大士覺而追想謂之應夢羅漢率意揮染皆其真容非

世間相末乃照水自狀本形既而絕筆後一軸題云大蜀國龍樓待詔明因辨果功德大師翔麟殿引駕內供奉繼律論道門選練教授三教元逸大師守兩川僧錄大師食邑三千戶賜紫大沙門貫休字德隱自正本外別有臨摹二本 游宦紀聞

董其昌釋迦成道記跋京師明因寺僧永舜昔年欲刻此記于石幢散施諸方時達觀禪師在都下度夏於潭柘謂舜上人曰此必得董太史書上人遂礱石相待時逾二紀予再入春明上人年六十餘矣觀師語有如受記上人堅固之願何可負也書以付之 容臺集

清化寺在正東坊有勅建碑 順天府志

程敏政宿清化寺詩早脫朝簪出帝城喜分禪榻坐深更頓疑身在山中住追笑詩從馬上成把鈞未應歸計拙照人偏愛佛燈明枕酣一夜清無夢蕉鹿當年亦浪驚 篁墩集

崇真觀司禮監太監張政捨宅建正統十四年賜額景泰四年國子監祭酒胡濙撰碑 析津日記

崇南坊在新城廣渠門左安門東南角七牌三十三舖有地藏寺法藏寺妙音寺寶應寺崇教寺安化寺吉祥寺 五城坊巷衢集

泐藏寺舊名彌陀寺金大定中立景泰二年太監裴善靜修之更曰泐藏有祭酒胡濙沙門道孚二碑道孚戒壇第一代戒師世人稱鷲頭祖師者也北地多風故塔



不能空無可登者泐藏寺彌陀塔獨空其中可登塔崇  
十丈牕八面牕置一佛凡五十八佛佛設一燈歲上元  
夜僧然燈遶塔奏樂金光明空樂作天上矣帝京景物

郭正域泐藏寺詩古刹城西寺蓮花處處開金輪平  
地轉香雨半天來清話逢元度論文有辨才真如非

幻境雲水兩徘徊

黃離草

大悲寺在崇南坊有勅建碑

順天府志

夕照寺其建置年月無碑記可考或云燕京八景有金  
臺夕照此寺之所由名也

析津日記

安化寺在崇南坊有勅建碑

順天府志

晉寺穆宗受釐之地萬曆增修極其閎麗今則零落

無存矣

行國錄

張居正重修海會寺碑海會寺在都城之南創于嘉  
靖乙未穆宗皇帝嘗受釐于此皇上即位之二年聖  
母慈聖皇太后出內帑銀卽其地更建焉會游僧有  
范成銅像一軀無所庇覆司禮監太監馮保請移置  
其地復出內儲大木以為殿材中為殿三皆三楹方  
丈一凡五楹鐘鼓樓二配殿十二禪堂十僧房四十  
有奇前為山門繚以周垣又於其外拓地六頃以為  
焚修伊具之資

太岳集

崇北坊在新城廣渠門東北角崇文門外東河沿往東  
至都城東南角至便門東北角七牌三十七舖有天竺  
廟崇恩觀臥雲庵無量庵崇恩寺臥佛寺增福廟白雲

卷十六

寺積穀寺萬福寺五城坊巷衢街集

正德三年六月開設神木千戶所先是朝陽崇文門外大木廠二調鎮朔永平遵化等三十四衛所軍士千人護視神木至是軍士陳志等奏往來勤苦乞比蕃牧嘉蔬事例改設一所兵部覆奏從之武宗實錄

七年三月革神木千戶所同上

十年六月復設神木千戶所于朝陽門外從太監張銀請也同上

元至大四年十月勅繪武宗御容奉安大崇恩福元寺皇慶元年四月崇恩福元寺成元史仁宗紀

武宗及二后爲東西二殿藏玉卮十有二牒玉寶一鈕元史祭祀志

延祐元年閏月隆禧院官言世祖影殿有軍士守之今武宗御容於大崇恩福元寺安置宜依例調軍守衛從之元史兵志

天曆元年以南鎮國寺提舉司改崇恩福元提點所三年又改爲福元營繕司元史口官志

姚燧崇恩福元寺碑至大元年詔群臣曰昔朕萬里撫軍躬擐甲冑底平北寇時有願言俟他日振旅而南大建寶刹爲祖考薦福慈闈祝釐卿曹其灼是懷惟以其日鑾輅親巡胥地所宜於都城南不雜闐闐得是吉土勅行工曹斃其外垣爲屋再重踰五百礎門其前而殿于後左右爲閣樓其四隅大殿孤峙爲制正方四出翼室文石席之玉石爲臺黃金爲趺塑

三世佛後殿五佛皆范金爲席諸天之神列塑于廡  
皆梵像變相詭形怵心駭目至其椽題椽桷藻繪丹  
碧緣飾皆金不可貴美楯檻衡縱捍陛承宇一惟玉  
石榜其名曰大崇恩福元寺外爲僧房方丈之南延  
爲行宇屬之後殿庫廡庖湍井井有條所立隆禧院  
比秩二品守以相臣割田外郡收其租入以給祝髮  
者乘輿時臨留必信宿久或浹旬功垂什八期以四  
年正月八日大慶贊偏賚官役何意其日奄以奉諱  
皇帝踐位哀先志之弗竟懼成功之將墜飭敦匠臣  
益虔乃職罷行工曹入留鑰司之程以早集勅臣燧  
汝文之碑臣遂載拜稽首作頌曰猗嗟梵宮相方視  
址授其成規維昔天子寫材于江伐石于山言出風  
行草靡庶頑又假相臣汝往敦匠易衣寒暑饑俟汝  
餉于茲三年大立細捐垂欲落之而陟配天皇帝曰  
噫朕兄所志有銜未究其在傳次乃勅攸司無替爾  
程其用則取邦賦之經佛宇勅爲前古有是而其所  
無兩聖之治前聖往矣於佛焉依今聖年與日齊  
輝濡軌長江拳石喬嶽善頌之存梵唄攸託牧處  
隆安寺天順而廢刹也萬曆己酉僧翠林自蜀來募金  
錢修佛殿殿後堂三楹曰淨土社堂列龕五十三結僧  
徒念佛歲元旦設果餌享佛盤千數名曰千盤會寺後  
一閣崇禎元年僧大爲立帝京景物畧  
普陀寺金山寺在崇北坊俱有勅建碑順天志  
臥佛寺入山門有圓殿佛立其中後殿有臥佛長丈餘

有十餘佛環立肩背後寺無碑記止西廊一鐵鐘係正德戊辰年所鑄稱寺曰妙音寺

析津日記

正南坊在新城中門裏天地壇西四牌二十舖有般若寺古佛庵保安寺響鼓廟崇興寺

五城坊巷齋齋集

山川壇在天地壇之西繚以垣壇周迴六里中為殿宇以祀太歲風雲雷雨嶽鎮海瀆東西二廡以祀山川月將城隍之神左為旗纛廟西南為先農壇下皆藉田

明

宋樂十八年十二月山川壇成

成祖實錄

正殿七壇曰太歲曰風雲雷雨曰五岳曰四鎮曰四海曰四瀆曰鍾山天壽山之神前廡從祀六壇左京畿山川夏冬月將右都城隍春秋月將嘉靖十一年即山川

壇為天神地祇二壇以仲秋中旬致祭別建太歲壇專祀太歲東廡為春秋月將西廡為夏冬月將各二壇前為拜殿宰牲亭南為川井即山川壇舊井有龍蟄其中壇西南有先農壇東旗纛廟壇南藉田在焉隆慶元年禮官議天神地祇既從祀南北郊仲秋不宜復有神祇壇之祭罷之而太歲之祭如故

春明夢餘錄

國初肇祀太歲禮官雜議因及陰陽家說十二時所宜之神太祖乃定祭太歲于山川壇之正殿而以春夏秋冬四月將分祀兩廡或謂月將非經見者按禮祭法埋少牢于泰昭祭時也相近于坎壇祭寒暑也太歲實統四時而月將四時之候寒暑行焉今祭太歲月將則固時與寒暑之神也載諸祀典孰謂非經見耶

餘冬序錄

嘉靖九年改定風雲雷雨神牌次序曰雲雨風雷上曰雲雨風雷天神也嶽鎮海瀆地祇也城隍人鬼也焉可雜于一壇而祭之議以城隍之神歸之本廟於常祭外添祭一壇

嘉靖祀典

禮臣上言太歲之神自唐宋以來祀典不載惟元有大典作祭于太史院亦無常祭國朝始有定祀是以壇宇之制於古無稽按說文太歲木星也一歲行一次應十二辰而一周天其為天神明矣亦宜設壇露祭但壇制無考應照社稷壇築造高廣尺寸差為減殺庶於禮適宜詔可

同上

神祇壇方廣五丈高四尺五寸五分四出陛各九級墻方二十四丈高五尺五寸厚二尺五寸靈星門六正

南三東西北各一內設雲形青白石龕四於壇北各高九尺二寸五分

春明夢餘錄

地祇壇面濶十丈進深六丈高四尺四出陛各六級墻方二十四丈高五尺五寸厚二尺四寸靈星門亦如神壇內設青白石龕山形三水形二於壇北各高八尺二寸左從位山水形各一于壇東右從位山水形各一于壇西各高七尺六寸

同上

祭雲雨風雷嶽鎮海瀆山川諸神每三歲一親祭以丑辰未戌用事雲雨風雷之神四壇南向五嶽五鎮五山四海四瀆之神五壇北向京畿山川西向天下山川東向

嘉靖祀典

太歲壇在山川壇內中為太歲壇東西兩廡南為拜殿

殿之東南砌燎爐殿之西為神庫神厨宰牲亭亭南為川井外四天門東門外為齋宮鑾駕庫外為東天門春明夢餘錄

祭太歲月將等神于太歲壇每歲于立春大祫用事正祀某甲太歲之神東廡春秋月將之神西廡夏冬月將之神嘉靖祀典

先農壇在山川壇內大歲壇傍之西南永樂中建為制一成石包甃砌方廣四丈七尺高四尺五寸四出陞西為瘞位東為齋宮鑾駕庫東北為神倉東南為具服殿殿前為觀耕臺臺用木方五丈高五尺南東西三出陞臺南為耜田護壇地六百畝供黍稷及薦新品物又地九十四畝有奇每年額稅太常寺會同禮部收貯神倉

以備旱潦嘉靖中建圓廩方倉以貯粢盛上耕耜田親祭餘年順天府尹祭春明夢餘錄

弘治元年二月孝宗皇帝行耕耜田禮順天府率兩縣官耆老之後添上中下農夫各十人穿本等衣鞋各執農器引見叩頭令其終畝人賜布一疋後循以為例嘉靖祀典

親耕耜田合用田具什物黃龍口等犁牛具順天府造辦彩旗樂人禮部備辦庶人絳衣絳履巾襪并大紅紗滿紅燈祭器工部修造教坊司合用樂器銅鑼四面黑油腔大鼓四面小鼓二面黑油腔鼗子四面白鐵鈎青絲繩穿紅油木楸四把木叉四把掃帚四把斗蓬四箇蓑衣四領黑油杠四根青絲花繩四根同上

駕祀先農躬耕藉田工部題請將黃龍口犁黃犍牛黃  
絨鞭黃套索各一紅犁黃牛紅絨鞭紅套索各十二鐵  
箸鐵鋤木鋤竹筐米篩竹箕荆筐掃苗掃帚簞箕各十  
把二副行順天府辦送

水部備考

天順乙酉仲春元辰上親耕于南郊命朝臣從耕于是  
少保吏部尚書華蓋殿大學士李賢禮部尚書姚夔兵  
部尚書王竑工部尚書白圭吏部右侍郎翰林院學士  
彭時戶部左侍郎楊鼎耕其左廣平侯袁瑄隆平侯張  
佑定襄伯郭登吏部左侍郎翰林院學士陳文吏部右  
侍郎尹旻通政使張文質耕其右戶部尚書馬昂進耒  
耜上耕藉三推從耕者各五推九推訖京尹及赤縣令  
率耆庶終畝

水東日記

嘉靖九年二月上躬耕藉田三公九卿執事官一十二  
員昌國公張鶴齡建昌侯張延齡大學士張璁翟鑾吏  
部尚書方獻夫兵部尚書李承勛戶部尚書李瓚禮部  
尚書李時刑部尚書許讚工部尚書章拯都察院右都  
御史汪鉉翰林院學士顧鼎臣進耒耜執事官五員戶  
部尚書梁材太常寺卿陳道瀛鴻臚寺卿魏境少卿孫  
伯義順天府尹黎奭

嘉靖祀典

崇禎七年二月上親祭先農壇行耕藉禮十五年二月  
上復親祭先農行耕藉禮戶部尚書傅淑訓進耒耜順  
天府尹張宸極進鞭上左手秉耒右手執鞭三推步行  
犁土中盡壟而止耕時教坊司引紅旗兩旁唱禾詞老  
人牽牛二人扶犁二人耕畢戶部尚書跪受耒耜置犁

亭府尹跪受鞭置鞭亭府尹捧青箱播種耆老以御牛  
隨而覆之上御觀耕臺於是大學士周延儒賀逢聖張  
四知謝陞陳演吏部尚書李日宣六人耕于東定國公  
徐允禎恭順侯吳惟英清平伯吳遵周戶部尚書傅淑  
訓兵部尚書陳新甲工部尚書劉遵憲六人耕于西順  
天府廳官各執箱與種太常卿奏耕畢駕至齋宮農夫  
終畝科臣沈迅以考坊承應歌詞俚俗請改正上諭禮  
臣以後耕藉宜歌爾風之詩春明夢餘錄

按耕田耕罷燕及群臣教坊承應作黃童白  
叟鼓腹謳歌爲伴醉狀弘治初元耕藉教坊  
以雜劇承應左都御史馬文升厲色曰新天  
子當知稼穡艱難豈宜以此黷亂宸聽卽斥

去之思陵命改歌爾風信卓見也

顧鼎臣帝耕躬耕賦帝在位之九載大業朗以遐宣  
闢兩儀以作事掩六極以爲鄺四時肇其順序入政  
飭而罔愆猶且遡王事之本念民事之艱憲古昔以  
示勸躬往耕乎藉田是月也星麗辰角日移參尾太  
皞司辰勾芒佐理律應夾鍾節惟雨水當木德之在  
御見斗杓之東指林含烟以葱菁華綴露而旖旎長  
川漾而流碧芳草靡以成綺羌萬井與千廛咸戒期  
於于耜乃命司空治館金吾視壇燦宮岌嶸絳殿蛇  
蜒青幄雲駐翠幙氛連有崇臺以觀稼亘千畝兮陌  
阡若天造而地設以待聖天子之幸焉爾乃卽齋宮  
坐宣室儷朱紘戴青幘祝史正辭巫咸獻吉璠露朝



嚴金根宵飭服葱韞於紺轅駕蒼龍以縹輓後車備  
播殖之器中宮獻種稂之實於是勾陳肅隊招搖啓  
途六軍雷動七校風驅前披雲以建纛後捎星而曳  
旗草莫莫兮承輦花菲菲兮襲裾至則直廬周設崇  
卑在位耆老偕觀耕夫咸萃眎翠旄之誕臨歡聲騰  
而動地爾其配后稷享先農奠蒼鼓與元醴燎芳桂  
與香薷太牢薦而肥腩太簇奏而從容既用虔於裸  
鬯乃躬卽乎田功于焉京兆奉鞭司徒獻耜牛澂澂  
以從縻畝响响其如祗群歌而田鼓聲聞三推而土  
膏脉起陟巍臺以俯眺視萬民之舉趾大徇之典將  
行享醴之讌斯啓時則大宗伯捧策而進曰陛下應  
農祥而發令順陽氣以時行耜于畝于畿甸勤萬乘  
以躬耕示三農以崇本垂百世而爲經天子有睟其  
容賑然而喜曰黍稷馨香邊豆以飭者孝之則也三  
時不違唯農是恤者仁之錫也庶土任宜深耕易耨  
者政之式也余一人念稼穡之艱難躬胼胝而無逸  
雖六府之孔修猶日慎于一日豈止於奉遺典而循  
行慕前修而潤色者哉于時上率元臣載拜稽首奉  
萬歲之觴上一人之壽鑄玉策而紀瑤編勒鴻猷以  
不朽頌曰於惟上聖秉化權兮洪澤汪濊溢八埏兮  
百祀咸秩儀孔虔兮爰稽昔典耕藉田兮帝旣至止  
三推先兮群工卿寺禮罔愆兮農夫終畝播殖蕃兮  
以供粢盛潔且蠲兮雨風時若大有年兮小臣稽首  
載颺言兮

顧文康公集

卷十六

七

劉榮嗣駕耕藉田恭紀青陽膏土動郊原玉軼乘時  
出應門自古有年歌帝力於今祈穀荷君恩西疇椰  
帶宮雲煖上苑花迎稼雨繁田峻於時占介福茨梁  
早已報曾孫半冊集

陳子壯耕藉禮成作天子親行畝微臣相秩宗清塵  
傳蹕靜瑞霽出郊濃高柳喧靈鵠華芝結袞龍普天  
應有兆九穀在三農兩朝遺詩

旗纛廟在大歲殿之東亦永樂中建神曰旗頭大將曰  
六纛大神曰五方旗神曰主宰戰船之神曰金鼓角鏡  
砲之神曰弓弩飛鎗飛石之神曰陣前陣後神祇五猖  
等衆皆南向旗纛殿內府仲春遣旗手衛官祭于廟霜  
降祭于教場歲暮祭于承天門外春明夢餘錄

靈佑宮在南城山川壇之北舊爲十方道院止一楹爾  
萬曆壬寅始拓爲三楹名真武廟越歲癸丑司禮監魏  
學顏闢地數十畝建閣一爲殿五請于朝賜額曰護國  
靈佑宮碑文大學士福清葉向高所撰湖廣道御史晉  
陽潘雲翼書行國錄

仁壽寺顯德廟遺址也萬曆元年伏牛山行者真玉卓  
錫于此內宮張朝因宮女陳秋香聞之仁聖太后遂捐  
貲屬司禮監馮保建寺始于是年四月明年正月賜額  
曰仁壽有李廷機劉效祖二碑析津日記

李廷機仁壽寺碑都城午門外數里許有寺曰仁壽  
聖母仁聖懿安康靖皇太后所建而皇上肇錫之名  
也寺以萬曆二年庀工營建前爲山門天王殿中爲

佛殿旁爲伽藍祖師殿後爲顯德殿爲方丈爲僧舍而方丈之後復以十三年命尙膳監太監周貴造延壽藏經樓左右配殿及僧舍繚以周垣賜地百五十畝莊舍七十二間課其歲入爲神供命僧明忠主之御用監太監劉彥典領焉且命司禮監太監張誠立石記歲月而詔臣記之

李文節公集

黑龍潭歲旱於此禱雨

析津日記

晉陽庵出宣武門二里許內有古銅觀世音像高三尺餘下有欵識云大慈貞觀年尉遲敬德監造黎秘書民表隸書古佛庵三字極工後移置稽山會館

覽志

燕都遊

郭正域詩古佛城東寺相傳歲月深不知經幾劫

坐到于今

黃龍草

崇興寺明天順四年勅建後比丘尼居之

行國錄

都城之南舊有寺曰靜寧圯已久矣有僧弘瓊栖其地御用監太監潘瑛爲之建寺肇自天順庚辰訖于成化丁亥寺成請于朝賜額崇福寺有二碑一兵部左侍郎兼翰林學士淳安商所撰中書舍人直文淵閣錢唐凌暉書一播陽釋道源撰禮部郎中鄞人章規書寺今圯矣而土人尙目之曰新寺

析津日記

按都城自遼金以後至元靡歲不建佛寺明則大璫無人不建佛寺梵宮之盛倍于建章萬戶千門成化中京城內外勅賜寺觀已至六百三十九所見周尙書洪謨奏疏中王

宮保延相詩云西山三百七十寺正德年中  
內臣作則城中所建可類推矣迨萬曆初孝  
定皇太后營造愈衆而一經修建寺額輒更  
如憫忠靜寧相去甚邇同更曰崇福後人之  
考證實難安得好事者詮金陵之塔寺記洛  
陽之伽藍表西湖之淨社俾京師舊蹟一覽  
而得不亦快事哉

正西坊自正陽門外西河沿至宣武門響鬧橋東六牌  
二十四舖有延壽寺雲峯寺觀音寺雲居寺萬善寺擡  
頭庵五城坊巷緡術集

遼聖宗統和六年四月幸延壽延洪二十遼史游幸表  
十二年四月以景宗石像成幸延壽寺節僧遼史本紀

十五年四月幸延壽寺遼史游幸表

興宗重熙十一年十二月幸延壽寺飯僧詔宋使觀擊  
鞠同上

燕京蘭若相望大者三十有六然皆律院自南僧至始  
立四禪寺曰大覺招提竹林瑞像延壽院主有質坊二  
十八所僧職有正副判錄或呼司空松漠紀聞

童貫蔡攸帥師入燕號撫定勒碑于延壽寺以紀功將  
佐姓名皆列于碑留十日乃回東都事畧

太上北至燕山寓上延壽寺北狩行錄

道君以丁未五月十八日到燕山於延壽寺駐蹕所取  
本朝輅輦逍遙子俱在延壽寺安放七月中旬鄭后體  
違和淵聖諸后同來延壽寺候問燕雲錄

京師延壽寺凡五六所大約皆為祝釐而建惟琉璃廠  
東北一區明正統六年開渠得斷碑上有延金延壽字  
可辨太原僧湛然因為重建而翰林檢討四明汪奉為  
之記此當是遼金舊址也寺在遼金時稱巨剎遼三嘗  
臨其地見游幸表金人以栖道君汴京所獲車輦悉置  
于寺意今之廠地皆昔寺之基而今之寺特其一隅焉  
爾 祈津日記

明教寺在正西坊有勅建碑

順天府志

日下舊聞卷十六終

日下舊聞卷十六補遺

城市七 南城

國朝郊祀贊禮者太常寺之道士奏樂者神樂觀之道  
士皆異端也天神何為而格哉 留青日札

許穀謁皇穹宇詩分祀崇郊典嚴居肅帝宮高明一  
祖配陟降八神同紫氣團華蓋元陰接上穹萬年瞻  
秉璧靈貺自無窮 石城集

崇文門外打磨厰金忠潔公鉉故居

青箱堂集

正統己巳春打磨厰西軍人王勝家井中有五色氣 馬氏日鈔

京師神木厰所積大木皆永樂時物其中最巨者曰樟  
扁頭闊二丈外馱四丈餘騎而過其下高可隱身歲久

風雨淋漓已漸朽矣 春明夢餘錄

安國寺在三里河之南一里建于天順元年其碑禮部尚書胡濙撰文中書舍人陳紳書 行國錄

慈源寺碑正統初立太常少卿括蒼潘辰撰文中書舍人張天保書 同上

慈源寺東數百武有關王廟相傳卽元崇恩萬壽宮殿中塋像甚古作姚彬被縛狀始元時舊塑元設梵像拈舉司專董繪畫佛像及土木刻削之工故其藝特絕後人不能爲也寺僧云彬初爲黃巾賊將貌類關壯繆其母病思食良馬肉彬知壯繆所騎赤兔最良因投麾下竊赤兔以逃關吏察其音不類河東執以歸壯繆彬惋死臨刑忽大哭壯繆問之則以與母永訣故爾乃

釋之事不見于野史世所傳關公事蹟亦無之荒唐之辭不知何所本也 寄園寄所寄錄

安化寺正統八年賜額有光祿卿雲間張天駿碑記 行國錄

京師三黑龍潭一在城西畫眉山一在房山縣一在南城黑窑廠皆禱雨之地也黑窑廠潭一方池爾本湖時中有一井以石甃之 愚山集

袁楠天慶寺佛殿上梁文寶構凌空稱華嚴之富貴青蓮湧地成祇樹之神通雪堂老禪心匠虛明性宗真淨住南城數十載名滿江湖祝北闕億萬年日巖香火雖紺宇禪扃之已敞而璇題秘殿之未雄靈山之法會如新黼展之綸音已下無踵而至不日以成

繡栱結飛霞稱由旬之龍象金波麗鳩鵲儼第一之  
人天清容居士集

崇文門東南有淨度寺按元張中丞養浩作其子鴈奴  
壙銘有云權厝文明門外淨度寺之南原寺蓋元時有  
之矣人海記

國朝於大祀殿祀昊天上帝凡所謂天皇太一之類一  
切革去三代以下祀典之正所僅見也博物典彙

清化寺在三河里陽宣德壬子奉聖夫人東安皇王妙  
秀命其弟義勇後衛百戶榮以賜金買故保安寺基卽  
蔬圃爲寺落成于正統甲子有奉議大夫金陵宋拯撰  
碑正德壬申四月望燬于火癸酉二月重建乙亥五月  
訖工有石中允濮陽李廷相碑懷志

明因寺故三聖寺也萬曆初慈聖宣文明肅皇太后改  
建賜額殿左一碑萬曆十七年立司經局洗馬汝南王  
祖嫡撰右一碑萬曆二十年立禮部左侍郎汝南何洛  
文撰殿後右廡有董尚書其昌所書釋迦如來成道記  
自稱香光居士記凡十二版嵌于南北壁各六版天啟  
四年刻石帝京景物畧謂在僧寮左壁非也敬懷錄

王暉大都創建天慶寺碑國家鼎定全燕教隆內典  
故精藍勝刹莊嚴寶啣金碧相望維永泰寺肇基自  
遼彌陀者永泰之別院也大安兵燼廢撤不存鞠爲  
茂草者五十餘年至元壬申有僧雪堂始來結菴而  
主之先是師在雲朔假息間有以天慶名所棲而告  
之者初不喻其故旣而觀光大都駙馬高唐郡王出

重幣易是院爲師駐錫之所迨甲申冬皇孫紺麻刺  
出貨泉二千五百緡泊名驃二仍諭畱守段禎詹事  
丞張九思卽所居庀徒歲事起三大士正殿丈室七  
巨楹下至門閭庖湏賓客之所畧皆完美始於乙酉  
之春成于丙戌秋仲初作闕地得廢鐘所刻天慶二  
字攷之蓋有遼建號也夢旣協卽爲新寺名額師諱  
普仁字仲山姓張氏雪堂其號也世爲許昌人 秋澗集

工部設五六廠一曰神木廠在崇文門外額發軍千名  
辦工部曰大木廠在朝陽門外卽獐鹿房廠也辦工軍  
數與神木同凡各省采到木植俱于二廠堆放大木廠  
則兼收葦蓆一曰黑窩廠一曰琉璃廠燒作甃瓦及內

府器用一曰臺基廠堆放柴薪及蘆葦又有五小廠曰  
營繕所木工也曰寶源局金工也曰文思院曰玉恭廠  
俱絲工也曰皮作局革工也其外別設三廠曰北窰曰  
南窰曰蠟廠主范金合土之事後廢止徵地租銀貯節  
慎庫與料價同用 明水軒日記

北京神木廠大木俱刻字爲記其上有王二姐張點頭  
嫌河窄混江龍之名皮爛存心對面猶不相見 暖姝由筆



山下舊聞卷十七

城市八 南城下

宣北坊在新城廣寧門裏宣武門迤東響鬧迤西至都城西南角便門西北角七牌四十五舖有海波寺永光寺永興寺圓通寺玉虛觀接待寺竹林寺老君堂報國寺紫金寺昊天寺善果寺歸義寺弘法寺 五城坊巷術術集

永光寺元大萬壽寺也曹洞下青州辨公居之寺有大萬壽寺開山傳法歷代宗師實跡碑記文字磨泐又明正統十一年一碑本山住持本恩立石昭化寺住持妙清碧潭篆額碑稱辨公居此湛然屏山居士爲其上首外護湛然即耶律文正王楚材屏山金李翰林純甫也



萬壽寺有許道寧畫屏 金臺集

許道寧京兆人畫山水法李成獨造其妙 墨莊漫錄

葛邏祿廼賢萬壽寺懷古詩 皇唐開寶構歷劫抵金

時絕妙青松障清涼白玉池長廊秋屨響高閣夜鐘

遲獨自乘閒客扶藜讀舊碑 金臺集

按寺東清厰有巨潭易之詩所云清涼白玉

池者疑卽是也

京師賞花人聯住小城南古遼城之麓其中最盛曰梁

氏園園之甞丹芍藥幾十畝每花時雲錦布地香冉冉

聞里餘論者疑與古洛中無異 尊墩集

小南城梁家園往時芍藥最盛人多攜酒賞之後其

廢無一本在者 匏翁家藏集

梁園在京城之西南廢城邊引凉水河入其中亭榭花

木極一時之盛 春明夢餘錄

梁氏園在今京師西南五六里其外有舊城舊城者唐

藩鎮遼金別都之城也元遷都稍東於是舊城東半遂

入於朝市間全無跡可見而西半猶存號爲蕭太后城

卽梁氏園所在也蕭太后者遼后皆以蕭爲姓有子爲

帝則太后別居宮城統部屬故其亡也末帝淳之妻猶

得獨存稱太后以主其國踰年乃滅也或謂此雖遼金

都城而非唐藩鎮城不然也唐時此爲范陽藩鎮安史

反後改名盧龍而所治幽州薊縣不改今移薊以名州

移盧龍以名縣各去此數百里其實唐之盧龍與薊在

此也惡得非唐藩鎮舊城乎遼金不因藩鎮以爲都而  
曷因乎且稽諸載記遼金亦何嘗創建都城乎今其城  
僅存土爾甕皆爲人取去今取者未已其土皆真黃土  
人取之和煤炭以燒亦有卽之作墓者以其高堅也  
齊集

京師仙露寺明一統志寰宇通志俱不載順天新舊志  
亦無之近菜市西居民掘地得石匣乃遼世宗天祿三  
年所瘞中藏舍利無有也匣如石槲而短小傍刻僧志  
愿記其書布施金錢姓名其蓋已失始知此地卽仙露  
寺遺址地名千人邑故比丘尼皆曰邑頭尼  
忻津日記  
太上北至燕山寓延壽寺宗室嗣濮王仲理以下別居  
仙露僧舍  
北狩行錄

嗣濮王仲理以下宗女等千八百口至燕山仙露寺口  
給米一升半月支鹽一升二聖同聖眷起發中京金人  
納絹萬疋道君分賜百五十疋與仙露寺宗室作冬衣  
燕雲錄

釋志愿葬舍利佛牙石匣記畧達摩禪師遠涉流沙  
登雪嶺得釋迦舍利辟支佛牙授與先師先師諱清  
珣闕川人自會同五載仲秋賞舍利佛牙到此於八  
年季春月莫凋十一葉染病而逝臨遷化時將舍利  
佛牙付仙露寺講維摩經比丘尼定徽建宰堵波尋  
具表奏聞大遼皇帝降宣頭一道錢三百貫以充資  
助於天祿三年歲次己酉四月十三日安葬施主名  
具鐫于後  
吉金貞石志

記後有千人邑三字具列大遼皇帝皇后東明王夫人  
永寧大王燕主大王國舅相公宣徽令主李可興洛京  
留守侍中劉璠齊國夫人張氏男三司使道紀衙院馬  
九故太師侍中趙思溫男延照司徒李稱藥師奴華喜  
寺行仙馬知讓邑頭尼定徽幼澄喜嬭舍利六百三十  
三粒欽送到舍利一百一十粒析津日記

按仙露寺舍人俘宋宗室子女置其中見蔡  
條北狩行錄趙子砥燕雲錄顧地志失載遺  
踪遂不可稽康熙二十六年五月宣武門西  
南居民掘地得石匣匣傍有記自稱講經律  
論大德志願錄并書乃遼世宗天祿三年瘞  
舍利佛牙於此記後有千人邑三字蓋証名

也施主姓名首列帝后諸王大臣下及童男  
小女考遼史世宗妃甄氏後唐宮人帝從太  
宗南征得之寵遇甚厚及卽位立爲皇后至  
天祿四年方册立皇后蕭氏二后同死察割  
之亂並葬于醫巫閭山記刻于三年所云皇  
后蓋指甄也東明王者疑是明王安端卽察  
割之父以功王東丹國故曰東明王也燕主  
大王者中臺省右相滕疇爲南京留守封燕  
王故曰燕主大王也國舅相公者靖安蕭太  
后族只撒古魯以天祿元年爲國舅帳詳穩  
故曰國舅相公也獨趙思溫子延照史作延  
昭而通鑑亦作照常爲石晉邢州刺史後仍

歸遼餘子本末不得其詳矣又記有建寧塔  
波之文疑當時石匣置于塔下塔久廢而石  
匣僅存土中匣已無蓋其舍利佛牙又不知  
何時散佚也

金有玉虛觀元有玉虛宮今之玉虛觀未審卽其遺址  
否觀有正統中禮部尚書胡濙碑刑部侍郎周瑄篆蓋  
中書舍人吳謙書文稱正統丁巳鍊師吳元真來游斯  
地其址已爲錦衣千戶呂儀別墅有處士劉泰能言觀  
之舊蹟鍊師欲復之呂因捨其地於是總兵石亨捐貲  
以建及歲己未夏不雨惠安伯張昇詣觀請師禱雨有  
應事聞賜以綵緞至天順二年賜額御史李錦記其事  
焉

所津日記

天順丁丑僧慧菴建接待寺于宣武門右正德丙寅始  
訖工刑部尚書閔珪爲作碑記

同上

正德三年八月司禮監太監劉瑾傳旨改惜薪司外新  
廠爲辦事廠管府舊倉地爲內辦事廠時旣立西廠以  
谷大用領之瑾又立內廠以張其威京師謂之內行廠  
比東西二廠尤爲酷烈

武宗實錄

陳一夔贈趙栗夫詩菜市街西新卜居豆棚瓜蔓共  
蕭疎胸中富有書千卷誰笑家無儋石儲

七人聯句

詩集

正統五年六月行在翰林院侍講劉球奏天雨連縣宣  
武街西河決漫流與街東河會合二水汎溢淹沒民居  
請修築以消其患仍會官計議於城外宣武橋西量作

減水河以洩城中諸水上命工部右侍郎邵旻成國公朱勇勘視旻等稱球言實具修築事宜以聞復命欽天監正皇甫仲和審視作減水河利否仲和言宣武門西舊有涼水河其東城河南岸亦有舊溝皆可疏通以泄水勢上是之實錄

按成化中楊尚書鼎喬侍郎毅同袁參將佑會勘稱三里河源出彰義門外玉匠局等處馬跑等泉則自西而東不知從何處流入劉忠愍所云涼水河及城河南岸舊溝亦不辨所在海波寺久廢其街之南有清廠潭上有龍王堂又南東爲章家橋又南爲虎房橋橋西南爲潘家河沿計新城未築時無地無水今其故道皆不可考矣

崇禎丁丑九月車駕閱城總督京營成國公朱純臣及協理陸完學以營兵屯劄宣武門外上臨視大加稱獎於西南城樓召二人各賜以酒三杯杯用金椀便以椀賜之玉堂薈記

崇禎十年京師宣武門外斜街民家白鷄羽毛鮮好喙距純赤重四十觔慈溪應孝廉廷吉見之愀然曰此鷲也所見之處國亡綏寇紀畧

遼道宗清寧八年楚國大長公主捨諸私第勑厥精廬奉勅以竹林爲額奉福寺尊勝陀羅尼幢

竹林寺金熙宗駙馬宮也寺僧云一塔無影金臺集國少浮屠氏有趙崇德者爲燕都運未六十休致爲僧

自爲大院請燕竹林寺慧日師住持約供衆僧三年費

松漠紀聞

戊申三月劉彥宗搜索舉人赴燕山就試于竹林寺作  
試院南北同院異場引試二月十七日引試北人詩賦  
一場二十八日引試南人三場至三月二十七日開院  
北四百人取六分南六千人取五百七十一人劉彥宗  
云第一番進士須寬取誘之

燕雲錄

葛邏祿廼賢竹林寺詩城南天尺五祇樹給孤園甲  
第王侯去精藍帝釋尊老僧誇塔影稚子斲松根何  
日天台路相從一問源

金臺集

增壽寺在宣北坊有勅建碑

順天府志

廣慧寺古刹也在宣武門外一里嘉靖中太監劉成朱

仲修之有廣西按察司僉事余一鵬碑記

析津日記

長椿寺慈孝皇后建以居水齋禪師其大弟子爲神廟  
替僧賜千佛衣及姑緘衣各八百件米麥等物動千石  
有二庫監以二中官專貯三宮布施金錢

護聞續筆

萬曆中歸空和尚自伏牛入京能一再七不食日飲水  
數升衆遂號之曰水齋孝定皇太后聞而創寺居焉賜  
額曰明祚長椿寺有滲金多寶佛塔高一丈五尺

帝京景物畧

長椿寺水齋傳米萬鍾書

春明夢餘錄

廣德寺在宣北坊慈仁寺之左英宗實錄載太監王勤  
爲僧德觀請白金千兩修造廣德寺疑卽此也殿階東  
有匡山釋宗林碑文稱寺係古刹正德間重修嘉靖六

年太監金允等塑香花菩薩于殿中今鐘鼓樓皆圯矣  
析津日記

大慈仁寺殿前二松相傳元時舊植臺石一株尤奇寺  
後毘盧閣甚高望盧溝橋行騎歷歷可數閣下甃觀音  
像高可尺餘寶冠綠帔手捧一梵字輪相好美異僧云  
得之窰變非人工也 燕都游覽志

孝肅周太后有弟吉祥兒時好游去家此時太后尚未  
入宮也久之祝髮大覺寺好游如故夜即來報國寺伽  
藍殿中宿報國寺者京城宣武門外小寺也太后夜忽  
夢伽藍來告妃弟在我殿中宿其夜英宗夢亦如之覺  
而相怪遣小黃門物色之至則小黃門見吉祥伽藍殿  
中遂擁以行入白帝后皆喜具平生后為泣 曰吾弟

出家何如皇親寵耶吉祥曰即皇親寵何如出家樂復  
還寺后厚賜之英宗晏駕憲宗即位為建大慈仁寺居  
之賜莊田亡慮數百項也 名山藏

慈仁寺俗呼報國寺蓋先有報國寺在寺之西北隅也  
今僧院中尚存遼乾統三年尊勝陀羅尼石幢 析津日

音韻直指玉鑰匙門法一卷大慈仁寺沙門清泉真空  
編凡二十門 百川書志

高叔嗣寒食登毘盧閣詩高樓晴出帝城南楊柳千  
家夜雨含欲換春衣驚客久况逢寒食思誰堪門前  
歸路愁心繞檻外羣峯癖性耽憑報故人應竊笑微  
身何事戀朝簪 蘇門集



楊慎夏日登毘盧閣詩赫曦改東陸鮮飈轉南薰炎  
歎深城府清冷阻江濱隱几倦文竹緇書厭香芸春  
言承明侶肅此塵外羣仙梯駕虹出梵閣排霞分攀  
楹低白日對檻俯朱雲圓方鶴舉見參差鸞歌開意  
樹鳴天籟禪枝繞烟芬斜景歛平靄飛雨灑高雲金  
罍引清酌玉塵生涼氛興謠吐雲藻搖筆揮風斤香  
留荀令榻書染羊欣裙奇賞真四美同詠慙五君  
菴集

王崇古夏日登毘盧閣詩佛閣俯層城登臨極望明  
雲連雙闕迴樹隱四郊平坐久夜初寂風回暑欲清  
何當臥松牖烟月愜初盟  
山堂彙稿

陳鳳報國寺松詩偶共菩提樹同生般若林蛟龍各  
殊狀霜霰詎能侵空樂風前度天花雨外深聞來  
攀賞三宿媿茲心  
清華堂稿

俞允文秋日登毘盧閣和韻金園寶樹含朝爽寂寞  
烟蘿象外盤坐上青蓮看欲動興中白雪和應難四  
山暝色依人近一笛秋聲向夕闌別有仙直花未落  
更宜留步月中看  
俞仲蔚詩集

歸有光報國寺贈字上人作慈宮崇象教構此絕華  
炫深巖闕香火危峻瞰郊甸鬱鬱虬松枝低壓繞廣  
殿當年帝舅親削髮住茲院說經老龍聽出手五獅  
現曾聞長老言天雨曼陀遍吾識字上人頭陀今突  
弁修容眞法相妙悟在論讚導我畫廊行指示西方  
變晨起供清茗時共禪悅飭我老欲歸去世事今已

倦當結塵外緣山中儻相見 震川集

陳衍上報國寺毘盧閣詩十丈青蓮朵朵開毘盧高

閣獨崔嵬欲看山勢連天遠已見河流帶雨來宮樹

陰濃秋未落塞鴻聲斷晚尤哀烽烟直北何時息處

處關門鼓角催 大江集

程嘉燧除夕踏雪看松作久客懷人百事情春歸幾

日是殘冬長安雪後無來往報國門前獨看松 松園

浪淘集

槐樓在報國寺左武清侯李公別業置三層門于上層

級升之碧梯赤欄隱見蒼霞碧霧間望之勝于登焉 燕

都游覽志

遼大昊天寺碑道宗皇帝書 墨池編

一聖之北狩也道君由滑瀆至燕山淵聖由淮陽

中既至燕山二聖兩寺居處七月十旬於昊天寺相見

親王東序駙馬西序道君居在左面淵聖居右面皇太

子祁次南面西酒五盞自早至午禮畢而歸 燕雪錄

昊天寺遼刹也碑記無一存者訪之惟有萬曆間山陰

朱敬循一碑其建置本末俱不詳塔址已為居民所侵

寺門一井泉特清冽不下天壇夾道水也 所津日記

郝經登昊天寺寶嚴塔詩旭日燒銅輪赤氣繞車轂

平步登青天陸海一龍窟寶藏沙劫開冥兀翻地軸

瑰奇入霄漢締構窮土木萬穿翡翠籠直到蓮心出

錯落金鯨鱗蹭蹬木蛇腹致身知幾層如覺重錦束

巧碎雕鏤心力盡撐拄骨合脊三天神倚疊萬國佛

丹青雜珠璣新若手未觸盤盤老風煙天門瑣寒玉  
乾坤一柱旁日月互生沒六年五入燕空爲眼中物  
于今始一登頓覺超凡俗曠宇凌高寒飄飄肆遐矚  
海卷碣石回天壓陰山覆盧溝一衣帶居庸險何足  
蒼蒼金臺雲青青薊丘竹昔賢今不見悵望空注目  
下視極羽淵黃能尚盤屈窟宅幾千祀潛姦富凶毒  
魑魅不能禦何人與驅逐燕雲割山河神州疆理蹙  
稱臣又呼父萬古天王辱一登還百憂慘澹意回復  
安得脫世網對此傾醅懽慷慨澆心胸醉向天邊宿

陵川集

善果寺在宣武門外西南一里白紙坊舊名唐安寺天  
順甲申尚膳監陶榮復建既訖工賜今額內有翰林修

撰嚴安理太常寺卿張天瑞二碑一立石于成化丁亥  
一立石于弘治十六年碑俱云寺乃南梁漢興元府唐  
安寺也文義殊不可解析津日記

歸義寺不知建置歲月元人混一方輿勝覽載之則金  
元之舊刹也行國錄

娑娑亭在彰義門內元馬文友別墅也名勝志

文友又築飲山亭春明夢餘錄

宣南坊在新城右安門裏東宣武門大街南五牌二十  
七鋪有碧霞元君廟新寺憫忠寺五城坊巷衚衕集

永慶寺在教子衚衕無碑記可考析津日記

尉使君寺北魏元象元年幽州刺史尉長命造後改爲  
智泉寺則天后時改爲大雲寺開元中改龍興寺在憫

忠寺前隋造塔藏舍利處春明夢餘錄

尉長命大安狄那人參預齊神武起兵破爾朱氏于韓

陵拜安南將軍以幽州刺史督安平二州雖多聚斂然

以恩撫人少得安集北史

秦定四年正月皇子允丹藏十受佛戒於智泉寺元史

秦定帝紀

舍利塔建于隋仁壽二年正月幽州節制竇抗所造水

塔五層扁舍利于其下至唐文宗太和八年塔災宣宗

太和丙寅得石函于故基遂移置于憫忠寺多寶塔下

僖宗中和壬寅又災延燒憫忠寺樓臺俱燼昭宗景福

壬子迁舍利于閣内春明夢餘錄

燕山京城東壁有大寺一臨名憫忠廊下有石刻云唐

太宗征遼東高麗回念忠臣孝子没于王事者所以建

此寺而薦福也東西有兩磚塔高可十丈云是安祿山

史思明所建塞北事實

史思明僭位于范陽建元順天國號大燕六月于開元

寺造塔改寺名為順天薊門紀亂

幽州憫忠寺本唐太宗為征遼噶二將士所造又有開

泰寺魏王耶律漢寧造皆遣朝使游觀王沂公上契丹

事

憫忠寺建于唐貞觀十九年太宗憫東征士卒戰亡收

其遺骸葬幽州城西十餘里為哀忠墓又於幽州城內

建憫忠寺中有高閣諺云憫忠高閣去天一握是也春

明夢餘錄

貞觀十八年七月營州都督張儉率幽營兵及契丹奚以伐高麗十一月張亮爲平壤道行軍大總管李世勣馬周爲遼東道行軍大總管率十六總管兵以伐高麗新唐書

貞觀十九年夏四月誓師于幽州城南因大饗六軍以遣之七月進軍攻安市城至九月不克乃班師十一月幸幽州大饗還師舊唐書

蘇靈芝行書寶塔頌今在京師憫忠寺碑稱御史大夫史思明奉爲大唐光天大聖文武孝感皇帝敬无垢淨光寶塔頌春明夢餘錄曰此碑蓋建于思明初歸附之時按舊唐書肅宗紀至德二載十二月賊將僞范陽節度使史思明以其兵衆八萬與僞河東節度使高秀巖

並表送降三載正月上皇御宣政殿册皇帝尊號曰元天文武大聖孝感皇帝二月大赦天下改至德三載爲乾元元年今此碑建于二載十一月而已稱尊號又以大聖字移在文武之上與史不合後至燕締觀此碑前行大唐光天大聖文武孝感皇帝及中間唐字史思明字類磨去重刻者石皆凹而首行憫忠寺上原只二字今改范陽郡三字蓋思明復叛之後磨去之及思明誅此地歸唐後人重刻者也此碑書丹于石故以左爲前金石文字記

范陽郡憫忠寺御史大夫史思明奉爲大唐光天大聖文武孝感皇帝敬无垢淨光寶塔頌惟唐紹統分歲作噩天宅幽都分鎮戎索彼命啟與禪虞繼鳳舉

而龍躍馭闔闔而朝南而服日月而昇寶殿在睿衝  
以正乾坤握金鏡今臨宇縣東宅四水西都八川  
應景福億萬斯年神祇盼蠶而不祐風化洋溢而瞻  
宣疑心姑射既邁黃軒之理端思真境高撫洪崖之  
肩迴出三界超居四禪我御史大夫忠而孝愆而賢  
裨我唐祚崇斯福田昔在棘城結願已修于寶塔屬  
茲版蕩除惡務盡于幽燕開拓郡縣馳突戈鋌咸荷  
威力掃逆清邊樹茲幢相游亦忘筌割淨賞以檀舍  
施珍饈于慈緣爰居爰處載詢載度薙金界于祇園  
擇伽藍之勝託徵郢匠稽樸斲具鈎繩備丹雘才生  
明而畚鍤攸萃月貞胡而陶旋斯作暨峻砌而崛堦  
堂皇聚楨榦而上干寥廓爾其庀徒有節力工惟  
隱金椎以雷動走瓠觥以星馳椽之登登斗拱磊  
以扶衛築之閣閣甃甃羅而緝熙駢密石以疏對  
齊玉璫以鎮陞斑閒布白九隅八維風伯雨師扣靈  
壇而請命雷公電女擁仙座以忘疲熠如聚鴈赫若  
奔螭岌業天假髣髴神資千龕櫛比以攢構萬塔陵  
競而護持觀其捫重肩披藻井鴻蒙異狀啞咤靈影  
霞駭雲蔚陽舒陰靜游三界而須臾視一劫而俄頃  
示大方便開大法境闡偈而刀輪折鋒承風而火穿  
收猛嶷若蜃樓之孤秀皎類扶桑之映迴蓮花吐日  
攢太華之三峯香鑪抱雲矗廬巖之一頂若乃八部  
經行萬方委輅離火宅啟棧喻魚貫爭上鴈行齊赴  
濟穹崇陟迴互嗜真如者搏級聚武而跼行慕釋猷

者跼虛悉倅而徐步攀芬撩以失視援井榦以增懼  
龍象翕赫扶禱櫺而蓄威鬼神睢眦捫頰壁以含怒  
將以經啟萬祀永代作固置呪于梵刹之中釋網于  
毗耶之路啟招提之勝果祛焚籠之緇蠹行善者技  
痒而爭趨爲惡者震慄而憂怖逗塔影者洽背而鬼  
悚聞鈴音者叩頂而心注是用敬我天威保我唐祚  
彼僮相之微福荷無疆之率裕也客有扣虛幕府忝  
掾神州媿三語之默對歸八解之禪流歸然寶塔永  
贊鴻猷護鵝珠以守戒持鵠珍以精修刻字金版垂  
芳朔幽雲行雨施自公乃侯永錫難老厥德允修恭  
察視之嚴命敢不拜敬王休范陽府功曹參軍兼節  
度掌書記張不矜撰承奉郎守經畧軍曹曹參軍兼節

靈芝書至德二載十一月十五日建 吉金貞石志

蘇靈芝儒生也嘗爲易州刺史郭明肅書侯臺記在幽  
燕之地中州患難得故契丹以墨本請權場易絹十端  
方與一本其行書有二王法而成就頓放當與徐浩雁  
行戈脚復類世南體亦善于臨倣者 宣和書譜

按是碑陷文甚多改刻者不特金石文字記  
所云十八字而已內如唐紹統三字宅幽都  
三字命啟與禪虞及下文繼共六字東宅四  
水西都八川八字唐祚二字除惡務盡四字  
皆鑿去重刻者考思明之降在至德二載十  
二月至明年正月肅宗始加尊號二月乃敕  
天下改元碑旣建于二載十一月不應預書

尊號又思明初附肅宗授以歸義王若碑建  
于降後宜大書王爵不當祇稱御史大夫然  
則是碑之建蓋在思明未降唐之先矣祿山  
僭稱范陽爲東都范陽郡三字其初必東都  
二字也文中凡唐字其初必燕字也安慶緒  
僭襲賜思明姓名爲安榮國史思明三字其  
初必安榮國也大唐一行其初必祿山父子  
僞號而其餘陷文皆諛僞逆之辭而改刻者  
也碑文以左爲前金石文字記謂書丹于石  
之故疑從祿山俗尚未可定也當日思明降  
而復叛旣誅之後唐人見其碑踣之惟恐不  
力安有反勒其名于石者乎此又事之所必  
無也

采師倫正書重藏舍利記今在京師憫忠寺碑建于會  
昌六年九月此初復佛寺之文也 金石文字記

采師倫書重藏舍利記舍利本大隋仁壽四年甲子  
歲幽州刺史陳國公竇抗於智泉寺剝木浮圖五級  
安舍利于其下卽子城東門東百餘步大衢之北面  
也原寺後魏元象元年戊午歲幽州刺史尉萇命造  
遂號尉使君寺後改爲智泉寺至大唐則天時改爲  
大雲寺開元中又改爲龍興寺大和甲寅歲八月二  
十日夜忽風雨暴至災火延寺浮圖靈廟颯爲烟燼  
洎會昌乙丑歲大法淪墜佛寺廢毀時節制司空張  
河張公崔敕于封管八州內寺留一所僧限十人越



明年有制再崇釋教僧添二十置勝果寺度尼三十人秋八月二十一日因板築于廢寺火燒浮圖下得石函寶餅舍利六粒及異香玉環銀釵等物伏遇司空固護釋門殷誠修敬仍送憫忠寺供養俾士庶瞻禮至九月二十八日藏之多寶塔下會昌六年九月吉金貞石志

按是碑建自唐會昌六年文稱舍利舊藏智泉寺寺經始于元魏幽州刺史尉萇命故又號尉使君寺按北史長命萇作長其曰節制司空清河張公則仲武也當武宗詔毀佛寺地分三等幽州等居上許留僧二十人尋又詔諸道留二十人者減其半故碑云勅于封

管八州內寺留一所僧限十人至是年宣宗卽位遂弛其禁先是智泉寺已燬遂以舍利歸憫忠寺焉仲武在幽州屢破回鶻鄭畋謂會昌時功第一方毀寺之歲五臺僧多奔幽州仲武封二刀付居庸關曰有游僧入境則斬之及宣宗增置僧寺碑稱司空固護釋門殷誠修敬若是乎前後不相伴者蓋仲武功名之士宜其好惡與時移也師倫無善書名然猶存王知敬薛稷遺意亦能拔乎俗者

景福元年重藏舍利記今在京師憫忠寺

金石文字記

景福重藏舍利記昔隋文帝潛龍日有梵僧自印土至授舍利一餅曰此釋迦遺形洎登寶位至仁壽二

年正月勅天下大州一百處建舍利塔時幽州節制  
竇抗創造五層大木塔飾以金碧局舍利于其下至  
大唐文宗皇帝大和八年經二百三十三年天火焚  
塔爾後五六年間武皇□□釋教至宣宗初登寶位  
歲在丙寅勅修廢藍將興□□得石函于故基下時  
旌麾清河公曉示人天尊□供施遷藏于憫忠寺多  
寶塔下復經三十三載中和二年歲在壬寅又值火  
災延憫忠寺樓臺俱燼旋遇□□淘汰空侶不葺年  
隴西令公大王大庇生靈巨崇象設舍已祿俸造觀  
音閣橫壯妙麗逾于舊貫寺僧復嚴陳力化導塑觀  
音像當景福壬子年僉欲遷舍利于閣內乃陳辭上  
瀆請發封壤上許之卽是年六月徒侶雲萃各竭其

誠塵壻曜靈香坐人手未淹食頃俄逢巨函縫印香  
泥記鐫貞石由是徹其蓋發其緘舍利光芒異香郁  
烈詣子東門上獻旌幢中權後營皆澡浴瞻禮餽施  
重沓復還本寺黃金瓶如薺麥量內藏一粒仁壽舍  
利也二粒在塔口內又二粒在小金合子內又九十  
粒如銀粟狀在琉璃瓶內玉環二髮七綜又有二粒  
在銀結條琉璃餅內故臨壇大德明鑒平昔隨身供  
養臨終授弟子栖忍今同收函內記曰大燕城內地  
東南隅有憫忠寺門臨康衢中有寶閣橫雲業虛閣  
有巨象觀音聖軀當像之前緘于舍利外石函封內  
金函闕填以異香雜以珍器用記歲年景福壬子葬  
舍利僧復嚴□街內殿講論兼應制大德沙門南叙

述僧知常書守因鐫

吉金貞石志

按是碑建于景福元年所云隴西大王者李  
匡威也是年李克用王處存合兵攻王鎔匡  
威救之有詔和解河東及鎮定幽四鎮碑稱  
欲遷舍利于閣內陳辭請發封壤上許之蓋  
匡威方恃燕薊勁兵有雄天下意宜有請無  
不許者碑文侈陳發緘時舍利光芒異香郁  
烈外石函封內金函闕其崇奉象教至矣迨  
明年匡威復出師救鎔其弟匡儔據軍府自  
稱留後匡威進退無所之鎔迎館于鎮登城  
西大悲浮圖顧望流涕未幾以圖鎔見殺然  
則事佛果得福乎舍利之塔一燔于太和八  
年一燼于中和二年今匡威所建之閣遺跡  
已不可問其碑僅存焉爾

宋真宗崩仁宗遣使告哀遼主集蕃漢臣舉哀令燕京  
憫忠寺置真宗靈御建道場百日東都事畧

遼重熙十一年十二月以宣獻皇后忌日上與皇太后  
素服鉢僧于憫忠寺遼史興宗紀

淵聖至自雲中駐蹕燕山憫忠寺燕雲錄

金大定十三年八月於憫忠寺策試女直進士寺舊有  
雙塔進士入院之夜半聞東塔上有聲如音樂西達于  
宮考試官侍御史完顏蒲涅等曰文路始開而有此得  
賢之祥也金史選舉志

寺中一碑下半斷裂可讀者其上段字有燕京大憫忠

寺觀音地宮舍利函記金大安十年沙門善製帝京景物畧

按是碑文字悉完未嘗斷裂末云大安十年歲次甲戌閏四月辛未朔二十二日壬辰申時功德主燕京管內左右街都僧錄崇祿大夫檢校太師行鴻臚卿聰辯大師賜紫沙門善製門人義中書

蕭王與沈元用同使北館于燕山憫忠寺暇日同行寺中有唐人碑辭皆偶儷凡二千餘言元用素彊記卽朗誦一再蕭王不視且聽且行若不經意元用歸欲矜其敏取紙追書之不能記者闕之凡闕十四字書畢蕭王視之卽舉筆盡補其所闕無遺者又改元用誤誤四五

處置筆他語畧無矜色元用駭服老學菴筆記

胡沙虎遷衛紹王于衛邸召完顏綱囚于憫忠寺金史完顏綱傳

謝枋得字君直信州弋陽人寶祐中舉進士中乙科除撫州司戶叅軍德祐元年以江東提刑江西招諭使知信州信州不守乃變姓名入建寧遂居閩中至元二十三年集賢學士程文海薦宋臣二十二人以枋得爲首辭不赴又明年行省丞相忙兀台將旨召之枋得不赴詔丞相義之不强也又明年福建行省叅政管如德將旨如江南求人材尚書留夢炎以枋得薦終不行福建行省叅政魏天祐見時方以求材爲急欲薦枋得爲功枋得見天祐傲岸不爲禮與之言坐而不對天祐怒强

之而北二十六年四月至京師問謝太后攢所及瀛國  
公所在再拜慟哭已而病遷憫忠寺見壁間曹娥碑泣  
曰小女子猶爾吾豈不汝若哉不食而死宋史

湯雷奮挽謝疊山詩向老逢危亂提軍復欲東九遷  
徒有命一戰不成功楚戶言猶在韓仇事已空風塵  
長蒼莽身世轉飄蓬芒屨初就道慷慨不辭難袞袞  
長江盡蕭蕭易水寒風霜欺漢節塵土上南冠無復  
加餐食傍人掩淚看大節應無憾初心不望還昔非  
蹈東海今見餓西山毀譽從茲定哀榮等是閑綱常  
元未泯公死實相關懷哉千古事百鍊不爲柔漢祖  
猶封齒殷臣不仕周寧隨文相國直匹李潭州浩蕩

江湘接東西萬古愁翰墨全書

胡文友挽謝疊山詩戎馬庚申後朝廷喜懼秋諸公  
爭頌莽一士獨傷周揚屋言終棄風塵恨未休興亡  
天數在我欲咎人謀償金成往事投老復臨戎奉使  
危城裏提兵小邑中報韓如有托興漢豈無功不用  
論成敗英雄見自同仗劍辭陵母關山十載餘深懷  
應有待天意竟何如張儉終亡命虞卿但著書茫茫  
六合內何處著吾廬從容仍慷慨萬世史臣書恨士  
心先阻仁賢氣自舒何人分葬地有客護喪車應共  
文丞相騎龍入太虛同上

袁繼成燕都弔謝疊山詩北風塵起征車促南火傷  
心不再噓三敗猶還仲母在兩旬忍餓漢臣如歸降  
當日原無表却聘留今只有書天使先生沉卜市建

陽橋亦首陽居 六柳堂遺藁

韓雍請謚宋臣謝枋得疏竊見宋禮部侍郎謝枋得登科對策力詆權姦發策漕司極攻時政受任于運去祚移之後抗敵于兵疲民散之餘力已盡而不支志有為而不果後元臣程文海等交章累薦耻仕二姓懇辭不履叅政魏天祐強逼北行誓死不食終于燕京著為文章發明道學羽翼聖經無愧昔賢有功後進竊惟伯夷叔齊死殷周之際至宋而追封諸葛亮顏真卿忠漢唐之朝至元而加號古之君天下者蓋有所見而非為無益之舉也乞勅禮部翰林院儒臣議加贈謚錄其子孫庶使天下之人知為人臣而能死忠死節者雖百世之後亦得顯揚垂休後嗣以

增志十仁人之氣沮亂臣賊子之心 韓襄毅公集

景泰七年九月以巡撫江西右僉都御史韓雍之請事下禮部尚書胡濙等以為文天祥已建祠于順天府學之右歲時遣官致祭惟謝枋得祀典有關宜令原籍所司歲舉祀事仍行翰林院議賜謚於是少保大學士陳循等議天祥孤忠大節為宋臣首設謚法臨忠不忘國曰忠秉德遵業曰烈請謚曰忠烈枋得仗節死義為天祥亞按謚法遵德博聞曰文謹身制度曰節請謚曰文節帝曰獎忠所以勵臣節也有司其如所議行 實錄 憫忠寺經正統七年重修改額崇福有翰林院待詔陳贄碑萬曆三十五年又修有諭德公龔碑 帝京景物 史蕭登憫忠寺開詩淨宇懷超想層梯跋俊游喧卑

三界盡制作六丁愁聚土闌童三移山老此丘能除  
分外見寸木卽岑樓

中州集

邵口至元九年登憫忠寺閣詩俯身直下臨無地飛  
步凌虛覺有梯遼宋封疆歸一統幽燕形勝控三齊  
扶桑東望滄溟小若木西瞻華嶽低安得憑風愬寥  
廓一枝回首謝甲樓

秋堂先生文集

葛邏祿迺賢憫忠閣詩高閣秋天迴金仙寶珞齊青  
山排闥見紫氣隔城迷朱棋浮雲濕羽簷落照低因  
懷百戰士惆悵立層梯

金臺集

又題雙塔詩安史開元日千金構塔基世尊寧妄福  
天道自無私寶鐸游絲罥銅輪碧蘚滋停驂捐遺跡  
含憤立多時

同上

張翥登憫忠閣詩百級危梯遡碧空憑闌浩浩納長

風金銀官闕諸天上錦繡山川一氣中事往前朝僧

白老魂來滄海鬼猶雄只憐春色城南苑寂寞餘花

落舊紅

蛻菴集

袁凱登憫忠閣作唐家高閣古城隈遠客登臨宿霧  
開諸帝園陵俱寂寞三韓魂魄尚歸來西山雲氣空  
中度東海潮音地底迴聞說關河有戎馬故園南望  
思悲哉

在野集

宣南坊白馬寺隋刹也後尊勝陀羅尼幢上刻仁壽  
四年正月上旬造寺重建于洪熙元年正統八年賜額  
有翰林學士南昌張元禎工部尚書直文淵閣嘉禾張  
文憲二碑其東有僧塔塔前有古碑已爲侵占者所毀

矣 析津日記

白紙坊在新城廣寧門右安門西南角五牌二十一鋪  
有小聖安寺大聖安寺寶應寺禮拜寺相國寺崇效寺  
五城坊巷劄錄

聖安寺元金所建 燕石集

寺有金世宗章宗二朝像 金臺集

按宋顯夫有南城俚歌十首其四云停驂惆  
悵聖安寺後堂空祀李宸妃則寺中所留像  
不獨一帝矣

聖安寺庭前有怪柏數株 湛然居士集

元世祖元統二年九月奉遷祖宗神主于聖安寺 元史  
祭祀志

中統三年十一月勅聖安寺作佛頂金輪會 元史世祖  
紀

王磐以年老乞骸骨行之日公卿百官皆設宴以饒明  
日皇太子賜宴聖安寺公卿百官出送麗澤門外 元史  
本傳

聖安寺元金元舊碑無一存者殿前明碑二一慈仁寺沙  
門德慶撰通政司參議廣陽趙昂書成化二十年九月  
立石一上谷參軍張壽朋撰江西道監察御史徐圖書  
萬曆十八年四月立石寺向有金世宗章宗李宸妃像  
今皆無之殿前怪栢已盡惟有兩楸樹而已其地名東  
湖柳村匪獨湖煙柳亦不見蓋此寺圯而復修於正統  
十一年易名普濟寺內官營建欲侈已功輒去故碣既



更新額并毀舊碑使考古者無足徵信真可憾也析津日記

葛邏祿廼賢聖安寺懷古詩蘭若城幽處聯鑣八月

來寶華幢蓋合袞冕畫圖開斷碣蒼苔暗空庭落葉

堆饑鳶不避客攫食下生臺金臺集

元至正初以唐貞觀元年所建佛寺舊址建寺賜額崇

效明天順間重修嘉靖辛亥掌丁字庫內官監太監李

朗於寺中央建藏經閣有都人夏子開高明區大相二

碑閣東北有臺臺後有僧塔三環植棗樹千株以地僻

游人罕有至者析津日記

弘仁萬壽宮萬曆四十三年勅建中為文昌殿額曰崇

真保運左以祀諸葛孔明封號曰天樞上相右以祀文

信國封號曰天樞左相皆目之曰真君祀雷神于後殿

設禮斗臺最後建高閣十三楹曰太極造運寶閣以安

昊天上帝有神宗皇帝御製碑文督工者司設監太監

林潮也內官不學神號無稽知禮者當議輟也行國錄

日下舊聞卷十七終

二澌曰本澌豈豈實園以安

日下舊聞卷十七補遺

城市八 南城下

劉崧順承門送別詩送客出城秋已涼太行南上楚  
天長順承門外斜陽裏蕎麥花開似故鄉 槎翁集

三忠祠在上斜街天啟四年春勅建以祀沁水張忠烈  
公銓襄陵高忠節公邦佐大同何忠愍公廷樞三公皆  
山西人故額曰山右三忠祠張公巡按遼東監察御史  
高公分巡遼海道山東布政司叅政何公分守遼海道  
山東按察司副使皆死王事張公初贈大理寺卿後加  
贈兵部尚書高何二公初贈光祿寺卿後加贈大理卿  
左右列陪祀諸公張公傍六人經畧標下統兵鎮守奉  
集等處總兵官都督僉事朱公萬良統兵援遼副總兵

官王公誥協守遼東副總兵官錦州叅將事麻公承宗  
援遼總兵官都督僉事楊公宗業協守開原副總兵官  
涼公巖援遼正叅將贈總兵官彭公振雲高公座右亦  
六人誥贈奉政大夫光祿寺少卿原任陝西鳳翔府扶  
風縣知縣王公國訓勅贈光祿寺寺丞原任順天府香  
河縣知縣任公光裕統兵援遼游擊將軍滿公龍麟誥  
贈奉政大夫光祿寺少卿原任順天府大城縣知縣武  
公維周勅贈光祿寺寺丞原任直隸順義縣知縣上官  
公蓋遼東鎮守標下叅將管中軍事梁公汝貴何公座  
側則有誥贈奉政大夫光祿寺卿前分守開原道山東  
按察司僉事潘公宗顏誥贈光祿寺卿原任直隸永平  
府知府張公鳳奇皆與何公並列其左右列者鎮守遼

東總兵官都督同知馬公林統兵援遼游擊將軍李公  
鎮忠領兵援遼守備劉公興漢領兵援遼千總劉公起  
佩又戚公士榮楊公其勳二神位附祀共二十八人蓋高  
張何三公爲當時勅祀而後死諸公其鄉人以皆山西  
人死王事故附祀之祠無碑記可考列主亦多繁亂意  
當時附祀者必列于兩廡後始遷入堂中故耳楮園雜  
記

紫金寺在宣武門外迤西寺門西向有嘉靖三十二年  
尚寶卿河間李圻碑記謂寺始建於宋云人海記

慈仁寺本爲周太后弟吉祥建而寺有成化二年御製  
碑止云爲太后祝釐不及吉祥蓋當時尚諱言其事唐  
應德詩云同行更說前朝事繡麟銀魚有故僧至歸熙

甫作記始詳言之寺建于故報國寺山門之東南都人  
至今日爲報國寺然實非報國舊址也 排悶錄

唐順之登毘盧閣詩高閣迴臨飛鳥上丹梯千仞恣  
攀登臆邀佛日金人下地逼宸居玉殿層一老擊鐘  
時放梵幾人面壁坐傳燈同行更說前朝事繡蟒銀  
魚有故僧 荆川集

吳子孝慈仁寺詩微鐘卧聽昔年曾門掩花香白髮  
僧今日重來心轉寂一函經對佛前燈 玉涵堂集

俞允文登毘盧閣詩古閣秋氣清千里滅烟霧連山  
開雲氣頽城斷行路殘僧守荒齋寒鳥落高樹中多  
故人情停杯日空暮 俞仲蔚集

大定二十四年二月大長公主降錢三百萬建昊天寺

給田百頃每歲度僧尼十人 續文獻通考

中統三年十二月作佛事於昊天寺七晝夜賜銀一萬  
五千兩 同上

至大二年十一月昊天寺無因而火 歸田類藁

天會五年迎旃檀瑞像到燕京建水陸會七晝夜奉安  
于憫忠寺 同上

元宗嗣位遣使者公乘鎔航海至契丹鎔以蠟封帛書  
遣王朗齋散號子歸聞奏散號子不知何等語也詞曰  
臣鎔自去年六月離罌油七月至鎮東關遣王朗奉表  
契丹九月乃有番官夷離畢部牛車百餘乘及鞍馬治  
路置頓十月至東京今年正月方至幽州館於愍忠寺  
先迎御容入宮言元欲識唐皇帝面乃引見如舊儀契

丹主手樹一玉鍾酒先自吸乃以勸臣飲醕自旦至日  
晡始罷陸氏南唐書

京師二月淘溝穢氣觸人南城爛麵衙衙尤甚深廣各  
二丈開時不通車馬此地在憫忠寺東唐碑稱寺在燕  
城東南隅疑為幽州節度使城之故濠也寄園寄所寄

寶應寺相傳唐刹也今惟存萬曆壬寅年所立一碑行國錄

京師報國寺古松二株在佛殿前低枝曲榦假單各十  
餘步望之如青鳳展翅處其下如山間松棚六月消夏  
尤所宜也六研齋筆記

遼道宗喜作字秦越大長公主捨棠陰坊第為大吳尺

寺帝為書碑及額今在燕京舊城書史會要  
永興寺在宣北坊柳巷之南寺東向南行約五十步折  
而東有興仁寺南向其建置歲月無碑記可考矣行國錄

孟思雨登毘盧閣詩蕭蕭連夕雨秋意滿長安碧樹  
楸梧老清宵枕簟寒功名羞短髮鄉思俯危闌紫塞  
紛戎馬悲歌行路難龍川集

南城諸坊白紙坊最大元于此設稅副使北自善果寺  
南至萬壽宮西極于天寧寺皆是也自嘉靖築新城以  
城墻界之坊割而為兩輿志

歸義寺在善果寺西遼刹也天王殿前一碑無撰書人  
姓氏額題彌陀邑特建延院碑文稱寺肇自清寧七年

買徐員外地遂為歸義寺備書寺基墻垣尋尺以及佛像經藏之數碑陰首書疏主懺悔師守司徒純慧大師賜紫沙門守臻本行僧錄檢校司空精修大師賜紫沙門智清次載邑衆姓名開府儀同三司守太尉兼中書令幽國公劉二玄開府儀同三司兼侍中開國公趙徽建雄軍節度使開國公劉需諫議馬子詮尚書張挺中舍李思口秘書省校書郎劉文左班殿直韓允右班殿直王規燕遼國妃劉蕭氏遼國夫人杜鄭氏其餘邑首邑長邑正押司官印官副正副錄知曆錢物各號不一又數十人倚晴閣雜抄

歸義寺剏于遼內有石幢記作駢語末書會同九祀龍集敦祥五月二十一日謹記又記云大遼保寧口年都

亭口侯太原王公為皇妣自會同九年捨資就奉福寺文殊殿前又建次幢于灑村之墳京東之墓云云建幢女弟子張氏長男攝祁州司馬口次男畱守押衙前都亭驛使口次男攝寰州長史恕口次男成郎婦次女李郎婦次女陳郎婦未嫁女吉年孫口三牛銀青崇祿大夫檢校工部尚書兼御史大夫上口任國鄭承嗣表弟閤門使崇祿大夫檢校口部尚書兼口御史大夫上柱國郭陟次表弟將仕郎前守昌平縣主口鐫字者尹奉威也人海記

徽祖上賓洪忠宣皓嘗於燕京口忠寺肆筵以奠程史陳孚偕劉東崖學士李兩山口侍郎登憫忠寺閣詩天京朝萬國十二舜神州宮闕開中禁關河拱上游扶

桑形氣近析木紺光流劍珮十牛衛旌幢五鳳樓玉  
泉蟠地湧金塔插天浮北嶽瑤符出南溟瘴霧收人  
皆躋壽域我亦步瀛洲智不如犀首癡猶過虎頭國  
恩難獨報儒術幸同儔偶此登阿閣悠然望薊丘長  
庚欣識李太乙願依劉雪擁飛狐夜風號涿鹿秋黃  
花堆徑溼紅葉繞城幽且盡一壺酒掀髯送白鷗觀  
光集

邵經邦經涼水河作涼水河遶路依稀似故鄉野亭  
穿徑窄溪柳夾川長隔岸聞新曲回車露淺粧乘春  
且隨意莫負碧霞觴弘藝錄

崇禎中慈仁寺僧坐毘盧閣下聞程間有人語漸譁躡  
梯闕之有男女數人長止尺許一老叟出謂僧曰吾輩

本居深山思覩帝里之勝携家而來暫棲于此師母見  
迫不久當去師勿露必有以報也居數日僧復聞譁如  
前又闕之叟曰吾歸矣師可俟吾于郭外某處僧如其  
言候之不見倦臥于道左覺而探懷中得干錢焉昔金  
之將南遷也有狐舞于宣華殿元將亾狐從端明殿出  
此殆其類乎惟山談錄

燕士張文季讀書不求官治生不務富稍有贏餘即購  
求古器書畫仙露寺僧寶藏商鼎有年不惜百金易而  
得之秋澗集

王暉商鼎歌維商賢君六七作禮重蒸嘗制於鑠只  
緣近古俗忠厚象形作器窮精鑿效焚鐘鼎賜臣工  
重比謚贈縻天爵當時文獻不足徵故家餘俗歸寥

索蒼銅不逐太社亡千古流傳誇灑噩供佛牀頭夜  
壑深物歸所好得真託張君稽古負精識入手摩挲  
三歎息兩耳高撐足拱三六乳附觚何的歷饜饜繞  
腹雜雷紋紫翠英英悵猶濕細觀欵識商父丁崑玉  
南金非所惜平生澹癖心不足此日大嚼情暢適形  
模遠紹考古圖發揮假手詞人筆君不見當年萃叟  
負謁湯高宗彤日雉雒鬲黃金塗耳玉鉉光此事傳  
聞已陳迹一朝况墮三毫間神明之器今日擊或裊  
沉烟讀誥盤或挹殷谿煮巖石尚友直探三代英平  
生闕古心方畢同上

又登昊天寺寶嚴塔詩高標直上跨蒼穹物外方知  
象教雄九陌市聲開曉色兩都喬木動秋風遙憐漢  
馬屯湘渚安得長書附去鴻寂歷村墟野烟外誰家  
簾幙夕陽紅同上

又游聖安寺讀明昌間郝侯堯竹溪蔡無可等碑作  
滿馬京塵厭市喧捨鞍步入給孤園金鐙響泛松風  
冷寶月光凝瑞像尊恣觀交纏雙井閉雨花別是一  
乾坤布金不是包桑計空抱危言叶復吞同上

聖安寺一名柳湖中有佛像三諸天像四以藤爲胎泥  
金裝飾瓔珞甲冑俱嵌珊瑚青金諸寶石莊嚴精好寺  
僧云崇禎時大內賜出燕舟客語

長椿寺大殿旁小室內藏佛像十餘軸中二軸黃綾裝  
祇與他軸異展視之一繪九朶青蓮花捧一牌題曰九  
蓮菩薩之位明神京母李太后也一繪女像具天人姿



戴毗盧帽衣紅錦袈裟題菩薩號下注崇禎庚辰年恭  
繪烈皇生母孝慈劉太后也二圖不知何時安奉寺內  
今乃委積塵埃中 同上



日下舊聞卷十八

城市九 存疑

舜廟頌唐韋稔撰顏頹正書并篆額貞元十二年閏八  
月 金石錄

唐復舜廟頌在幽州 寶刻叢編

幽州有虞舜廟久湮至唐貞元間始復 金石古文

廟據金故苑西北隅兵後廢不治獨唐貞元間顏魯公  
子頹書幽州節度使韋稔重修廟碑尚存書畫端莊殊  
有父風 秋澗集

虞帝廟顏書元時尚在見王暉文集有大都復虞帝廟  
碑記謂此碑人屢欲易去葉以他用主者心惴恍若有  
儆動乃已後有道士陳志元起長春別院復購之約不

犯原刻止用石背及來徙碑跌圻矣而身挺植重不克  
舉道士惕息不敢徙仍安原處其著異如此春明夢餘

錄  
鐵牛廟在舊燕城東南有土埋鐵牛露脊不知起于何  
時元混一方輿勝覽

葛羅祿廼賢鐵牛廟懷古詩燕人重東作鎔鐵象牛  
形角斷苔華碧蹄穿土繡腥遺踪傳野老古廟託山  
靈一酌壺中酒穰穰黍麥青金室集

葛元哲鐵牛廟詩昔聞刀買犢今見鐵爲牛但保成  
功在無勞掘地求山川千古產禾黍大田秋邊鄙猶  
徵歛愁同木馬流文翰類選

唐遊擊將軍薛侯彥碑在幽州寶刻叢編

碑趙舍撰并書開元十八年正月立金石錄

唐故幽州都督河北節度使燕國文貞張公說遺愛  
頌孫述撰其畧曰渤海之北有山戎焉乍臣乍驕或  
息或縱鎮之以大府府有都督威之以大軍軍有節  
度二者之任萬邦之屏公受命處此聲振殊俗於是  
塹山澤起亭障塞雞鳴之阨守阜陵之衝遮大厦之  
路距盧龍之口延袤千里橫絕一方修塞之後人到  
於今賴焉辨其譜系范陽之大族也叙其封畧燕國  
之名都也徵其政理幽州之良牧也薊縣父老感之  
所致久而益思遠愬不才追書盛德辭曰聖出賢覩  
爲師爲輔大國宗文殊方畏武帝謂幽朔人思鎮撫  
受命載瞻聿來茲土謀猷旣壯闕漏咸補守固邦寧

財豐人聚四牡既駕三邊無侮何以予之元袞及黼  
范陽宗邑燕垂守宇德被寒翁恩深召父琢彼遺愛  
傳于終古貞石不騫薊丘之下

文苑英華

幽燕思先驛後有五樹檜忽生藥丸試摘服之徃徃療  
疾有驗

幽燕紀異

大悲閣榜虞世南所書

金臺集

遼太祖授石晉自潞州廻入幽州幸大悲閣指白衣觀  
音像曰我夢神人令送石郎為中國帝即此也因移木  
葉山建興王寺春秋告賽尊為家神

遼史

金大安二年十一月大悲閣幡竿下石隙中火出高二  
三尺人近之即滅凡十餘日自是都城連夜燔燹二三  
十處三月大悲閣災延燒萬餘家火五日不絕

金史五

行志

元至正十八年京師大疫宦者朴不花於大悲寺修求  
陸大會三晝夜凡居民病者予之藥不能喪者給之棺  
翰林學士承旨張翥為文頌其事曰善惠之碑

元史

葛邏祿廼賢大悲閣詩閣道連天起丹青飾井榦如  
何千手眼共著一衣冠金榜交龍狹瑯薨吻獸攢鬣

高天萬里白苧不勝寒

金臺集

唐處士富麟翁從縣令蒞通源游蘭居寺通源給以綠  
牝鞍

幽燕紀異

開泰寺魏王耶律漢寧造

王沂公上契丹事

開泰八年十二月幸開泰寺宴飲

遼史游幸表

重熙二十三年冬十月以開泰寺鑄銀佛像曲赦在京

重熙十一年十二月以宣獻皇后忌日上與皇太后素服飯僧于三學寺遼史

三學寺改名圓明請予為功德主因作疏曰粵三學之巨刹冠四海之名藍今改僧而舍尼遂從禪而革律邀印公為粥飯頭請湛然作功德主湛然居士集

張翥游城南三學寺詩南城多佛刹結構自遼金旁舍遺民在殘碑好事尋雨苔塵壁暗風葉石幢深一飯蒲團了蕭蕭鐘磬音晚菴集

聖宗統和六年三月幸延洪寺遼史游幸表

按延洪開泰二寺元混一方輿勝覽中猶載之至明修一統志及寰宇通志無有寺未必

盡廢也大約易其名故迹遂不可考矣

龍頭觀龍頭懸三牙籤刻曰建隆元年金臺集

葛邏祿迺賢龍頭觀詩仙館紅塵外龍頭得借看開函雲氣濕近席雨聲寒碧血凝螺黛云涎逼麝檀牙籤認題字猶是建隆刊同上

宣和二年既得燕山趙良嗣言頃在北國與燕中豪士劉範李奭及族兄柔吉三人結義同心欲拔幽薊歸朝瀝酒于北極祠下祈天為約宋史本傳

按幽州舊有醫無閭祠北極祠又有舜廟及燕四賢祠樂毅劉靖霍原均有專祠多山川神祇聖賢之祀至于元專奉釋道琳宮梵宇俾麗宮闕而凡在祀典者反廢而莫之舉矣

金國子學碑二在舊燕城南上刻春秋禮記文今磨滅不完明一統志

永安四年二月詔建太學于京城之南總為屋七十五區西序置古今文籍秘書省新所賜書東序置三代鼎彝俎豆敦盤尊壘及春秋釋奠合用祭器大金國志

大定二十八年四月命建女直太學金史世宗紀

元王惲修理大都南京石經事狀云竊見大都南京廟學所有九經石刻刊琢極精近年以來舊制既廢舉皆散亂于荒煙草棘間日就摧圯甚可惋惜且經之遺制自漢唐至今歷代聖王無不尊崇修理蓋重夫經世大法故也海宇混一方息馬論道之時據上項石經理合修立以彰國容按九經石刻舊在汴梁學宮金

置于燕今不復存矣春明夢餘錄

四賢祠者燕賢臣郭隗樂毅劇辛鄒衍也四像皆南面列坐一王者拱其側則昭王也國士劉鑿所塑技極精巧陵川集

吳陵燕刺王旦之陵故以吳陵名水經注

燕王陵有伏道西北出薊城中景明中造浮圖建刹窮泉掘得此道王府所禁莫有尋者通城西北大陵而是二墓址盤固猶自高壯竟不知何王陵同上

大定九年二月詔改葬漢二燕王于城東金史世宗紀

初兩燕王墓舊在中都東城外海陵廣京城圍墓在東城內前嘗有盜發其墓大定九年詔改葬于城外俗傳六國時燕王及太子丹之墓及啟墳其東墓之柩題其

端曰燕靈王舊舊古極字通用乃西漢高祖子劉建葬也其西墓蓋燕康王劉嘉之塋也蔡珪作兩燕王墓辨據塋制名物款刻甚詳金史本傳

少帝自金天眷五年十月至燕京居安普寺前後三四年天眷十年金主令帝出寺賜宅燕京之北其實有人監守之十二年九月燕京大火旬日不息焚死者千人金主勒兵出城北門避之于寶蓋寺去帝居所止數十步竊憤續錄

少帝到燕京居安普寺後徙居城南正田觀南燼紀聞

按竊憤錄南燼紀聞皆僞書也其紀欽宗留燕事蹟與北狩行錄燕雲錄不同蓋未足深信者

王處一寧海東平人大定二十七年徵至燕京居天長觀帝問衛生為治對曰含精以養神恭已以無為雖廣成復生為陛下言無易此者世宗嘉之牧菴集

永安丁巳王處一受第三宣于六月二十五日到都下天長觀七月初三日宣見賜坐帝問清淨經師解之次問北征事師答云戊午年即止後果應次問全真門戶師一一對答帝深嘉歎留連抵暮方出翼日賜紫衣號體元大師仍差遣近侍傳旨賜崇福修真二觀任便住坐每月給齋厨錢二百緡雲光集

永安元年九月朔幸天長觀二年七月幸天長觀建普天大醮泰和元年二月幸天長觀金史章宗紀泰和三年十二月賜天長觀額為太極宮同上

王元粹字子正初名元亮後止名粹平州人正大宋用  
門資叙爲南陽酒官遭亂流寓襄陽襄陽破隻身北歸  
家食燕中遂爲黃冠師有十月風霜侵病骨數家針線  
補殘衣之句親舊有憐其孤苦欲爲之更娶者子正已  
高舉主太極道院不返年四十餘病卒從弟鬱亦工詩  
中州集

披雲樓在京城南舊有題額是金章宗手書上有遠樹  
影雖風雨晦冥皆見春明夢餘錄

耶律楚材和韻題披雲樓詩閣上披雲第一重離離  
禾黍漢家宮牕開青鎖招晴色簾捲銀鈎揖曉風好  
景安排詩句裏閑愁分付酒杯中靜思二十年間事  
聚散悲歡一夢同洪然居士集

金承安間勅選僧祖朗爲香林禪寺開山提點

秘書省今在燕弘法寺

金國文具錄

元初設警巡院三至元四年省其一止設左右二院分  
領坊市民事元史地理志

全正十八年於大都在城四隅各立警巡分院官吏元  
史百官志

危素與學頌至正元年四月大都路都達魯花赤康  
里公伯嘉奴請作左右南三警巡院大興宛平二縣  
孔子廟并建學舍都府亟達諸禮部部主之中書省  
中書從其言各以室廬之在官者爲之三院之所轄  
五方之人聚焉必待教而後明况二縣在于畿內教  
之尤弗可闕也國朝建邦設都百年於此國學京學

規制已備顧於五廟學未遑有作而作于公尹京之日則公之於政可謂知本矣頌曰維昔大帝卽燕設都山高川迴神明相扶乃作廟學于京于國以祀先師以講道德人才勃興邦家之光小爲采椽大爲棟梁三院警巡以及畿縣置師無學有弗聞見繫康里公實蒞神京治政以平豪猾震驚曰茲教化爲予之責請於宰臣報可甚亟爰奏琴瑟升歌雅南籩豆在筵有赫其臨匪公言行際時之盛化被國都風俗以正肅肅冠裾誦詩讀書凡百多士毋昧厥初說學集

太極書院元中書行省楊惟中建

明一統志

中書楊忠肅公惟中立周子祠建太極書院俾師儒趙復等講授公遂知性理學慨然欲以道濟天下元名臣

事略

趙仁甫本宋人被俘居燕其經學文章雖李敬齋元遺山亦推讓焉靜菴筆錄

郝經周子祠堂裨道之統一其傳有二焉尊而王其統在位則以位傳化而聖其統在心則以心傳位傳者人人得之故常有在不忘心傳者非其人則不可得是以或絕或續不得而常也三代而上聖王在位則道以位傳堯舜禹湯文武周公是已三代而下聖人無位則道以心傳孔子顏曾子思孟子是已周室東亡秦人西并祗一王位屹爲爭奪之具得之者非血戰之豪傑則推外之子孫其心則蠱于佛老散于辭章弊于法律膏于功利壞于智數聖人不作疆有



力者學位而不置不復傳道而道統紊矣千有餘年  
之間學士大夫致志周力掇拾殘斷崎嶇章句不爲  
不勤其獨造自得力求特詣以道自任者如楊王韓  
歐絕無僅有雖競于一時而其學不復傳是以終不  
能永聖人之統續而復絕也剝蝕糜爛之餘偵踣撐  
裂之極獲聖人之心糾緝道緒傳諸其徒益久益彰  
者有宋春陵周子而已其學不知其所自不事章句  
不工文辭不務決科沛然一致諸道躋躄孔孟之後  
瞰視羲文之前揭振本根後泐土苴範圍天地窮神  
知化盡性至命創爲太極一圖申明大易先後天之  
幾著通書數十章指陳聖學之極致發前聖之蘊奧  
先儒之所未言爲道學宗傳心之統蓋其欲慮靜盡

極于精一篤于純誠遂造高明乃能如是故太極黃  
庭堅稱其爲人如光風霽月其瑩絕洞徹猶可想象  
一傳而得程顥程頤張載再傳而得湯時游酢卒之  
集大成于朱熹泛濫充滙洋溢旁薄君相服膺師儒  
鼓篋而學者遍天下六經語孟各爲傳註性理象數  
各爲論說正千載之訛復一貫之道旣傳諸其徒又  
傳諸後世又傳諸外國迄今二百餘年莫不知義理  
之所在各爲一太極反諸吾身各有一易使人人自  
致聖域而不以爲難由漢以來未之有也祠祀之禮  
盛于江南而未至于河朔今領中書相國楊公始嗜  
其學乃建太極書院于燕都立祠于院以祀周子以  
二程張楊游朱六子配食歲時釋菜尊爲先師燕自

安史之亂睽隔王化者將四五百年至于孔孟之祀亦將廢墜一旦祠祀道學宗師而以其徒配禮秩文采警動幽朔尤近世所未有也嗚呼道統爲不亡矣祠旣成適經貳于公而徵銘焉遂序其事而爲之銘周子諱敦頤字茂叔湖南道州人仕至虞部郎廣永提刑分司南京卒于江州嘗築堂濂溪以自名故門人號爲濂溪先生銘曰析木之津上扶斗極周子有廟復一太極民不鄙夷會歸有則渺渺絕緒如絲緝緝聖遠弗續又從而焚祇揚其波不探其源縱尋斧斤自戕其本舍轍而車血手燥吻客氣賈勇莫不償隕過高好奇誘于誕空看鳥應人自忘其躬不及與過皆失乎中聖心有端聖學有要無欲而一乃造其

妙無極之真根柢茲道道有一極極盡無餘轉幹化府推激神樞天地人物埏埴貯儲心死不傳乃載于書六經一易道統之集梁折山頽于載寥閔無爲升堂更孰入室口下有日五星聚奎發源湖南派流江西肩顏踵孟傳心仲尼伊洛湯湯會爲一水復生晦翁又一程子坦坦一道路昭昭一理太極有圖通書有章遂令燕雲亦如荆揚嗚呼盛哉吾道之光陵川集又太極書院記書院之名不以地以太極云者推本而謹始也書院所以學道道之端則著于太極宓義書易以之造始文王重易以之託始孔子贊易以之原始至于濂溪周子之圖易則又以爲動靜之幾陰陽之根建極承統開後世道學始今建書院以明道

又伊洛之學傳諸北方之始也一以爲名五始並見則幽都朔易復一太極也初孔子贊易以爲易有太極一再傳至于孟子後之人不得其傳焉至宋濂溪周子創圖立統以爲道學宗師而傳之河南二程子及橫渠張子繼之以龜山楊氏廣平游氏以至于晦菴朱氏中間雖爲京檜侂冑諸人梗路而其學益盛江淮之間粲然洙泗之風矣金源氏之衰其書侵滌而北趙承旨秉文麻徵君九疇始聞而知之于是北方學者始得見而知之然皆弗得其傳未免臨深以爲高也庚子辛丑間中令楊公當國議所以傳繼道學之緒必求人而爲之師聚書以求其學如嶽麓白鹿建爲書院以爲天下標準使學者歸往相與講明

庶乎其可乃于燕都築院貯江淮書立周子祠刻太極圖及通書西銘等于壁請雲夢趙復爲師儒右北平王粹佐之選俊秀之有識度者爲道學生推本謹始以太極爲名于是伊洛之學遍天下矣嗚呼公之心一太極也而復建一太極學者之心各一太極也而復會于極畫前之畫先天之易盡在是矣使不傳之緒不獨續于江淮又續于河朔者豈不在于是乎是公之心也學者之責也其惟勉旃同上

按濂溪祠太極書院寰宇通志一統志但云在城內而未詳坊市所在

武成王立廟于樞密院公堂之西以孫武張良管仲樂毅諸葛亮以下十人從祀每歲春秋仲月上戊樞密院

遣官行禮 元史祭祀志

杜康廟在舊城北 元混一方輿勝覽

劉秉忠雖居左右而猶不改舊服時人稱之為聰書記

至元元年翰林學士承旨王鶚言秉忠久侍藩邸參

幄之密謀定社稷之大計乃猶仍其野服散號深所不

安宜正其衣冠崇以顯秩帝覽奏即日拜光祿大夫位

太保參預中書省事詔以翰林侍讀學士竇默之女妻

之賜第奉先坊 元史本傳

三休道人稅居燕城之市榜其菴曰貧樂 湛然居士集

萬柳堂在府南 紀纂淵海

萬柳堂在府南元廉希憲別墅 明一統志

廉右丞園名花幾萬本號為京城第一 清客居士集

時營繕東宮工部官請曰世丹名品惟相公家乞移植

數本太子知出廉公家矣公曰若出特命園雖先業一

無所靳我早事聖主備位宰相未嘗曲巧恩澤方爾瘡

之顧以花求媚耶請者愧止 元名臣事畧

野雲廉公於都城外萬柳堂張筵邀踈齋松雪兩學士

歌姬劉名解語花左手折荷花持獻右手舉杯歌驟雨

打新荷之曲松雪喜而賦詩曰萬柳堂前數畝池平鋪

雲錦蓋漣漪主人自有滄洲趣游女仍歌白雪詞手把

荷花來勸酒步隨芳草去尋詩誰知咫尺京城外便有

無窮千里思 樂全堂廣客譚

京師城外萬柳堂亦一宴游處也野雲廉公一日置酒

招踈齋盧公松雪趙公同飲命歌兒解語花歌小聖樂

行酒小聖樂乃小石調曲元遺山先生好問所製名姬  
多歌之俗以爲驟雨打新荷者是也 輟耕錄

貢奎集廉園詩宿雨洗炎燠聯車越城關廣屢隘深  
潦飛棟栖連鬪行經水石勝稍見花竹環陰靜息影  
跡窈窕紛華丹兢兢是非責侃侃賓友閑蔬食嘗苦  
饑世榮竟何攀學仙本無術卽此趨塵寰 雲林集

野雲廉公未老休致其城南別墅當時稱爲廉園花園  
村之名起此內有清露堂扁至大戊申八月其甥疎仙  
萬戶後更號酸齋與許參政有壬同游主人命二人分  
賦長短句有壬得清字卽席成章調寄木蘭花慢主人  
喜甚榜之堂上 長客客話

許有壬木蘭花慢詞渺西風天地掃吟袖出重城正

秋滿園松枯石潤竹瘦霜清扁舟采菱歌斷但一  
泓寒碧畫橋平放眼奇觀臺上太行飛入簾櫳主人  
聲利一毫輕愛客見高情便笑剝驪珠蓮分水繭酒  
注金餅風流故家文獻况登高作賦有諸甥清露堂  
前好月多情照我題名 圭塘小藁

玩芳亭在府南元栗院使別墅 明一統志

馬祖常都城栗氏玩芳亭詩歲序催人老韶華逐酒  
濃開尊應數數閉戶豈重重花朶山猿折齋厨竹笋  
供京塵衣不染猶得媚春容 石田集

又城南絕句栗侯亭前花一園客來日日費金錢明  
朝碧樹春城合恨不江東問酒船 同上

王士熙題玩芳亭詩每憶城南路曾來好畫亭闌花

經雨白野竹入雲青波影浮春砌山光撲畫扇  
對蘿薜涼月照人醒何處春來好城南尺五天地幽  
迷曉樹花重壓春烟上客拋羅袂佳人舞畫筵晚來  
清興熟移坐曲池邊留客青春過題詩碧霧寒亂鶯  
穿舞障輕蝶立迴闌白日開樽酒清時早掛冠主人  
多雅興不覺玉卮乾拂拭亭前石東風屋角生淺雲  
浮水動遲日傍花明春去青林合人來白鳥迎暮塵  
回首處此地可忘情美酒朝朝熟佳賓日日來玉卮  
擎雨露翠袖拂塵埃預恐春城閉先教晚騎迴只今  
行樂地飛絮落莓苔皇元風雅

薛元卿燕栗總管玩芳亭詩栗氏林亭好南鄰借馬  
游藥欄當戶密徑近城幽未許朝參懶聊因逸興

留使君行樂處風物爲春柔文翰類選

南野亭在府南前臨澗水明一統志

宋裴賦苑主事南野亭詩女牆不隔鳳城春柳色危  
亭枕水濱夜城松風吹几杖曉闌花露濕衣中西鄰  
池館存碑石清勝園東里闢林園主人萬柳園得似  
夫君能曠達百壺清酒日頻賓燕石集

虞集詩門外烟塵接帝高坐中春色自幽亭雲橫北  
極知天近日轉東華覺地靈前嘯魚游留客釣上林  
鶯囀把杯聽莫嗟章曲花無賴留擅終南雨後青道

閣學古錄

遂初堂在府南元詹事張九思別業繞堂花竹水石之  
勝甲于都城九思常以休沐與公卿賢大夫觴詠於此

從容論說古今以達於政理非直為游樂也 明一統志  
趙孟頫詩青山繞神京佳氣溢芳甸林亭去天咫萬  
象爭白獻年多佳木合春晚餘花殿雕闌留戲蜂藻  
井語嬌燕退食鳴玉珂友于此終宴 松雪齋集  
垂綸亭元學士宋本故居在都城西南 春明夢餘錄  
袁榭垂綸亭辭漢滔流兮日傾東滄浪兮泠泠寒一  
士兮沉冥垂芒鉞兮不屑以贊明珥兮貝宮朱柯蔚  
兮青葱魚戢鱗以為衛兮龍騰章以屏氣謝媚嫫之  
常巧兮口垂沫以縱恣吾寧養之以歲年兮寶秘鬱  
而不宣豈直鈎以違衆兮守釣道之自然時至而迅  
舉兮匪荒幻之詭誘保真志以遂初兮考銘言于耆  
叟時俗眇其莫同兮承願訖依夫前聖之所究 清容

按宋顯夫為其兄作行狀稱學士生于大都  
為美坊今五城坊巷無此名

元有甄氏訪山亭在城西今莫詳其處矣 涿水亭雜識  
陳觀題甄氏訪山亭詩雨後西山翡翠堆結亭直欲  
近巖隈從今記取溪頭路一月須來一百回 元文類

安元之園亭在城北者曲太保之賢樂堂在  
城東者董氏杏花園其餘多在城西南自萬  
柳堂遂初堂飲山亭娑娑亭匏瓜亭玩芳亭  
南野亭垂綸亭而外尚有清勝園在萬柳之  
西見宋顯夫南野亭詩注意新城未築時或  
在今城內地亦有之不盡在門外也

城南有道者，署名松鶴堂。暇日同東平，王繼學爲避暑之游。因作聯句。石田集

馬祖常王繼學松鶴堂聯句。偃雲聳層霄，驚露落古雪。虬枝喜垂澗，鷺羽陋鳴埜。蟠石千歲冬，項朱百齡血。胎禽哺春巢，乳脂凝馥節。舞蓋竿籟喧，啄粒苔蘚嚙。元玉薰麝煤，碧脰溢鷄傑。陟岳秦爵崇，授甲衛軒劣。沐髮豹霧深，引吭鳳竹裂。風馭八極小，河舟三翼拙。魯縠曳離韃，夏社挺截薛。任重明堂材，言歸華表別。拳縮包胥立，堅剛伯夷烈。延世餌芳液，顧步炫高潔。作室擅茲美，觀物入獨閤。誓將束囊書，從爾解珉珉。同上

至元十一年十二月賜太一真人李居壽第一區仍賜

額曰太一廣福萬壽宮。元史世祖紀

至元十一年建太乙宮于兩京命李居壽居之領祠事

且禋祀六丁以繼太保劉秉忠之術。元史釋老傳

王士熙留題太乙宮作石徑松花靜掩扉芙蓉秋早

蝶雙飛主人何處采芝去待到日斜猶未歸。皇元風

雅

天曆二年十一月命道士建醮于玉虛天寶太乙萬壽

宮。元史文宗紀

葛邏祿迺賢玉虛宮詩樓觀迴深巷松枝夾路低拾

薪供早爨抱甕灌春畦經向琅函讀詩從古鼎題白

鬚張道士送客過桃溪。介臺集

李裴玉虛宮詩金水河邊蓮欲花菖蒲菱芡漾迴沙



醉來風弄浮萍影照見青天五色霞 李太史集

酈希誠居燕城天寶宮 元史釋老傳

趙復燕京玉清觀碑畧甘泉坊有東嶽行祠燕有隱

君子馬天麟斥地數畝雜草除穢售材陶

清觀正殿四楹立元始像齋堂寢室庖沔蔬井經理

備具罔有闕遺 甘水仙源錄

按元混一方輿勝覽所載尚有崇天壽聖壽

陽高真延祥長生神保元禧丹陽太清洞神

時賜帝微東華十四道觀

壽禪院者燕京大聖安寺圓通國師退老之舊居也

通六師祖則示寂于此先七日作頌萬松老人贊曰

下言而敏于行璞其貌而玉其心寒蟬將蛻尚炳餘

音廿八子瘞骨于國師靈塔之左去京城之南可一里

許 湛然居士集

至元二十一年九月以江南總攝楊璉真加發宋陵冢

所收金銀寶器修天衣寺 元史世祖紀

至治元年三月寶集寺金書西番般若經成 元史武宗紀

張翥宿寶集寺詩來借禪房宿悠然空客心殘僧幾

人在古殿一燈深簷鐸能蕃語齋居發海音重陽看

已近聊復此登臨 蛻菴集

大德五年二月賜興教寺地百頃 元史成宗紀

皇慶五年十月建帝師巴思八殿于大興教寺六年三

月賜大興教寺僧齋食鈔二萬錠 元史仁宗紀

巴思八帝師法號曰皇天之下一人之上開教宣文輔

治大聖至德普覺真知佑國如意大寶法王西天佛子

大元帝師板的達巴思八八合失輟耕錄

至治二年十月建太祖神御殿于興教寺元史英宗紀

鐵木迭兒取興教寺後墻園地三十畝元史本傳

皇慶六年六月賜大乾元寺鈔萬錠俾營子錢供繕修

之費元史仁宗紀

泰定二年七月修大乾元寺三年七月幸大乾元寺勅

鑄五方佛銅像元史泰定帝紀

按上都亦有大乾元寺

延祐三年以起延新寺始置營繕提點所天曆三年改

永福營繕司元史百官志

延祐五年十一月勅大永福寺創殿七年二月罷造永

福寺戊午建御容殿于永福寺至治元年二月大永福

寺戊元史仁宗紀

泰定二年正月奉安顯宗像于永福寺給祭田百頃元

史泰定帝紀

泰定三年十月中書省臣言養給軍民必藉地利世祖

建大宣文弘教寺賜永業當時已號虛費而成宗復構

天壽萬寧寺較之世祖用增倍半若武宗之崇恩福元

寺仁宗之承華普慶寺租權所入益又甚焉英宗鑿山

開寺損兵傷農而卒無益夫土地祖宗所有子孫當共

惜之恐茲後藉為口實妄興工役邀福利以逞私欲惟

陛下察之帝嘉納焉同上

國史院進先朝實錄儀中書命左三部太常寺少府監於興禪寺置局 元史禮樂志

至治元年十二月車駕幸西僧灌頂寺 元史英宗紀

後至元三年以燕鐵木兒居第賜灌頂國師曩哥星吉

號大覺海寺塑千佛于其內 元史順帝紀

至正元年正月命永明寺寫金字經一藏 同上

皇帝在春宮時嘗幸勝因寺棟宇華潔像設嚴穆顧昭

文館大學士頭陀教宗師溥光而美之溥光對曰都民

姚長者之力也因歷道長者平生勝因之勦也致幣五

萬餘緡大藏經一藏 雪樓集

度宗全皇后宋亡從瀛國公入燕京後為尼正智寺而

終 宋史后妃傳

元初京師禪學分萬松延洪二門比丘尼智公叅萬松者也耶律楚材因請其開堂住報先寺 析津日記

按元混一方輿勝覽所載尚有崇聖崇仁資

福薦福濟眾崇孝洪法奉聖法寶諸寺

錢塘汪元暈字大有以善琴受知宋主國王奉三宮燕

燕甚久世祖皇帝嘗命奏琴因賜為黃冠師南歸時幼

主瀛國公福王平原郡公趙與芮駙馬右丞楊鎮故相

吳堅留夢炎叅政家鉉翁文及翁提刑陳杰貴陽夢炎

與宮人王昭儀清惠以下二十有九人分韻賦詩以餞

其行 金臺集

水雲留金臺一紀琴書相與無虛日秋風天際束書告

行此懷愴然定知夜夢先過黃河也一時同人以勸君

更盡一杯酒西出陽關無故人分韻賦詩爲贈王清惠  
詩云朔風獵獵割人面萬里歸人淚如霰江南江北路  
茫茫粟酒千鍾爲君勸陳真淑詩云天山雪子落紛紛  
醉擁貂裘坐夜明日馬頭南地去琴邊應是有文君  
黃慧真詩云萬疊燕山冰雪勁萬里長城風雨橫君衣  
雲錦勒花驄此酒一杯何日更何風儀詩云十年燕客  
身如病一曲剡溪心不競憑君寄語愛梅仙天理見時  
人事盡周靜真詩云燕山雪花大如席馬上吟詩無紙  
筆他時若遇龐頭人折寄梅枝須一一葉靜慧詩云塞  
上砧聲響似雷憐君騎馬望南回今宵且向穹廬醉後  
夜相思無此杯孔清真詩云瘦馬長吟寒驢吼坐聽三  
軍擊刁斗歸人鞍馬不須忙爲我更釀葡萄酒鄭惠真

詩云琵琶撥盡昭君泣蘆葉吹殘蔡琰啼歸見休道煩  
說似唐僧三藏入天西方妙靜詩云萬里長城風淅淅  
一望薊州雲暮暮君今得旨歸故鄉反鎖衡門勿輕出  
翁懿淑詩云金門夜醉紫霞觴乞得黃冠歸故鄉一似  
陳搏歸華嶽又如李泌過衡陽章妙懿詩云一從騎馬  
逐鈴鑾過了千山又萬山君已歸裝向南去不堪腸斷  
唱陽關將懿順詩云十年半落醉穹廬不用歸榮駟馬  
車他日倘思人在北音書還寄雁來無林順德詩云歸  
舟夜泊西興渡坐看潮來又潮去江草江花春復春山  
青水綠元如故袁正淑詩云抱琴歸去海東濱莫逐成  
連覓子春十里西湖明月在孤山尋訪種梅人又章麗  
真長相思云吳山秋越山秋吳越兩山相對愁長江不

盡流風颼颼雨颼颼萬里歸人空白頭南冠泣楚囚袁  
正真詞云南高峯北高峯南北高峯雲淡濃湖山圖畫  
中采芙蓉賞芙蓉小小江船西復東相思無路通金德  
淑望江南詞云春睡起積雪滿燕山萬里長城橫縞帶  
六街燈火已闌珊人在玉樓間元暈既歸杭作懷舊一  
剪梅云十年愁眼淚交如今日思家明日思家一團燕  
月照牕紗樓上蘆笳塞上蘆笳玉人勸我酌流霞急撚  
琵琶緩撚琵琶一從別後各天涯欲寄梅花難寄梅花  
湖山類藁

按宋少帝三宮入燕元世祖命宰相出通州  
迎接黃羅張幔先燕三宮于會同館然後十  
次開筵月支棖萬石日支羊肉六千斤俱見

刁汪水雲詩集其待亡國君臣有禮比之金  
人迫辱徽欽迴不佞矣水雲南歸少主平原  
公以下及宮嬪一十七人咸賦詩詞祖道更  
見當日文網之踈水雲歸後少帝有詩云寄  
語林和靖梅花幾度開黃金臺下客應是不  
歸來其辭凄斷蓋卽懷水雲作也

安濟橋瀕危呼舍命橋是也燕石集

宋褰度安濟橋入史局詩街樹葱龍曉雨收官河相  
近御溝流帝城不足多塵土直住詩人到白頭同上  
柳河館牛山館通天館自燕京至中京北門徑路武經  
總要

幽都縣舊卽薊縣地今邑理薊西界太平寰宇記

建中二年於羅城內廢燕州解置在府北一里郡國縣道紀

薊州為朱滔所破州尋廢立幽都縣于故城太平寰宇志

迴城在大興縣元混一方輿勝覽

迴城在薊縣東唐遷營州于薊為築此城近薊名勝志

按迴城或以為在薊之北或以為在薊之東或以為在薊之南或以為近薊丘旁或以為在盧溝橋東究未知誰在

征北小城在府東或曰後漢末公孫瓚所築初平四年瓚與幽州牧劉虞積不相能瓚築小城于薊城東南

居之虞發兵討瓚乃為所敗晉置征北將軍營治此因名征北小城建興三年劉琨自太原犇段匹磾時匹磾治薊現別屯征北小城是也方輿紀要

文月門東二里曠地自畝環以葦樊樊之內皆蔬畦麥華溝塍秩秩如畫中置井作轆轤引泉灌注凡種藝具有條理鴻臚卿楊君思敬別業也有亭覆以茅幽邃而開爽亭之外雜植名卉異果周垣以護之垣外樹桃李杏花時盛開翛然有片夕之趣東里集

東郭草亭在府東南興濟伯楊善別業也每朝士休暇燕游及餞迎賓友咸憇于此明一統志

王英遊楊鴻臚東郭草亭作曉下鑿坡直春遊近郭園柳陰嘶過馬花塢駐行軒樹密集多鳥池清水有

源泛杯傾玉液展席坐雲根自有山林趣都無市井喧頻年遂幽賞感激荷天恩

泉坡集

楊士奇詩帝城南畔尋韋曲浩蕩風光三月中衢路塵埃過雨淨園林花木競春紅主人置酒興非淺眾客題詩歡不窮一杯一曲日西下更待銀蟾生海東

里集

按新城未築時草亭在東郭之外楊文貞記稱亭在文明門東二里則新城築後亭址在域內矣

祝參政顯初為給事中奉旨查在京寺觀無賜額者有青龍寺極閎麗僧言巨璫奉密旨所建顯不聽立請毀之西園聞見錄

正德四年二月以朝陽關外貓竹廠地給行大德元明宮初劉瑾奏請於朝陽門外作宮奉北極元帝祝延聖壽上既賜之額而瑾復請貓竹廠空地以贍香火上復許之命工部為之履畝定界所謂貓竹廠者工部亦無冊籍可考軍民廬於其內因而開種遂為已業或從便營葬無慮千家皆責令改遷力能遷者無幾餘皆發毀暴露冤號之聲沸于郊外

武宗實錄

劉瑾既誅工部請以所占貓竹廠地并吞併民間房屋墳墓查還給主廠仍還本部堆放竹木

同上

正德十六年八月工部左侍郎趙璜言劉瑾營造元明宮侵發居民田畝甚多瑾既伏誅當還主乃為姦臣獻皇莊之說以蠱惑先帝及陛下登極之初有詔改正

未幾又內傳仍舊臣等謂聖明在上豈有是事必太監  
王守賈友仍持皇莊之邪說以誤陛下耳夫一莊之利  
其而皇言所係甚大今開詔未數月而遽更恐非示  
天下以信也宜以其地爲戶部房屋歸本部改正折毀  
其有原被侵占而願贖者聽得旨悉依擬行世宗實錄  
李夢陽元明宮行今冬有人自京至向我道說元明  
宮木土侈麗誰辨此乃今遺臭京城東割奪而勢割  
截業出入日月開幘幘矯托敢與天子競立觀忍將  
雙闕同前屹石柱雙蟠龍飛梁透迤三彩虹寶構合  
沓殿其後儼如山嶽翔天中金銀爲堂玉布地千門  
萬戶森相通光景閃爍倏異雲烟鬼怪恍杳濛以  
東金榜祠更侈樹之松檟雙梧桐溟池島嶼鯁鯉躍

孔雀翫翠兼罷那知勢極有消歇前日虎豹今沙  
蟲牕屏自開衛不守人時遊玩搖玲瓏陛隅龍獸折  
其角近有盜換香爐銅青苔生泥鏡面鎖野鴿哺子  
雕花櫳憶昔此閤握乾柄帝推赤心闔閭忠威刑霹  
靈縉紳毒自尊奴僕侯與公變更累朝意叵測培克  
四海真困窮長安奪第寒巷陌心復艷此閤何蒙構  
結擬絕天下巧搜剔遂盡輸倖工神廠擇木內苑竭  
官坑選石西山空夷墳伐屋白日黑揮汗如雨斤成  
風轉身唾罵聞得知退朝督勞何匆匆人心嗟怨入  
骨髓鬼也孰復安高崇峩碑照耀頌何事或有送男  
充道童聞言愴惻黯無答私痛聖祖開疆功渠干威  
福開者誰法典雖嚴奈怙終錦衣玉食已叨竊琳宮



寶宇將安雄何宮不鑄護勅碑來者但看元明宮空  
同集

何景明元明宮行君不見元明宮中滿荆棘昔日富  
貴今寂寞祠園復爲中貴取遺構空傳孽臣作雄模  
壯麗臨朝廷遠勢連袞跨城郭憶昨已巳年來事秉  
權自倚薰天勢朝求天子苑暮奪功臣第江艘海舶  
送花石戚里侯門擁金幣千人力盡萬牛死土木功  
成悲此地碧水穿池象溟渤黃金作宮開日月虹霓  
屈曲垂三梁蛟龍盤拏抱雙闕城中甲第更崔嵬親  
戚兄弟皆闕闕戚里歌鍾賓客游排門冠劍公卿謁  
生前千門與萬戶死時不得一丘土石家遊魂泣金  
谷董相燃齋噉郁塢宮前守衛無訶呼真人道十三

四徒石戶蒼苔生鐵鎖玉階碧草搖金鋪星宮書閣  
見行鼠月殿夜禱聞啼狐遊客潛窺翠羽帳市子屢  
竊金香爐桑田須臾變滄海桃樹不復栽元都我朝  
中官誰最貴前有王振後曹氏正統以前不得聞成  
化之間未有此明聖雖能斷誅罰作新未見持綱紀  
天下衣冠難卽振中原寇盜時復起古來禍亂非偶  
然國有威靈豈常恃元明之宮今已矣京師土木何  
時止南海猶催花石綱西山又起金銀寺君不見金  
書追奪鐵券革長安日日迎護勅

大復山人集

韓邦靖元明宮行長安送客城東道柳葉楊花春正  
早元明宮前下馬時一片煙花長萋草宮中道士邀  
我入素果清茶日未昃白河東下楚城西指點湖山

三歎息正德三年與四年劉瑾專權斧展前可憐帝  
主推心腹縱有丘張豈比肩帷幄空多戚里恩論思  
無復侍臣尊千官盡走東河下庶政全歸左順門震  
主傾朝不自知回天轉日更誰疑金貂滿座銜恩日  
朱紱升堂頌德時翻嫌仇李光榮薄卻笑曹侯意氣  
卑謀生意拙還謀死更起元明作蒿里甲第侯王已  
莫論陰山將士那堪比土石西山半欲摧棟梁南國  
萬牛回虛閣平臨金闕杪假山下指鳳城隈琪花瑤  
草尋常得萬戶千門次第開千門萬戶誰甲乙元明  
之宮推第一金盃常思埋甲盾銅駝不解生荆棘自  
古威權不到頭九重一怒罪人收幾人烈焰俱灰滅  
一旦冰山作水流冰山烈焰事俱非座上門前客盡

稀須臾蔓草縈枯骨宛轉佳城屬羽衣門掩宮河十  
里長山藏隴樹一千行今古誰存三尺土姦雄空作  
百年怵春風有客時雙入寒食何人奠一觴臥牛不  
得歸岡勢怨鶴空聞繞夕陽夕陽漠漠歸鶴遶卻憶  
元明全盛時千人舉杵萬人和九仞爲臺十仞池雨  
露霏霾歸喜怒層青丹碧豈珍奇萬民累足臣屏息  
四海離心主不知從來偏重多憂患自古末流難障  
捍東京政事三公缺閭宦專權禍尤烈正統王振擅  
權時先朝李廣亦恣睢只今不獨劉瑾盛帝主傍前  
安可知倚社難熏古如此操刀必割誰能已三穴那  
能窮帝旁萬幾况復歸司禮救柱扶偏本不同更張  
琴瑟始成功還期至主思前事莫遣元明有別宮

鄭善夫元明宮行君不見元明宮中聚金碧云是權  
 璫結真宅貝闕憑陵上帝居彤臺照耀長安陌雕龍  
 鑄虎欵飛動至今赤日風雲黑崖壑天開朔漠搖鯨  
 鯢日吼滄溟仄採奇祇見靈怪集矯首翻詫星辰迫  
 西域祇園應渺茫六朝蕭寺空千百白龍胡為作魚  
 泣想爾當年勢輝赫土木經營動四方珍奇聯絡來  
 重譯分明造化出其手左揮右霍何不得欲將燕市  
 作蓬山便有仙人為驅石姦雄到死竟不悟驕奢之  
 末無終極氣數相乘可自由李貓趙鹿空回頭君不  
 見大市街頭權倖路古來齏粉誰曾收山谷集  
 薛惠元明宮後圃石山詩出郭仙城近幽福地遙

珠林行窈窕錦石上岩堯雲裡仙人酒山中玉女簫

蓬萊去何許東望海邊潮西原集

劉節元明宮詩弱草芊芊臥斷碑殘陽脉脉柳條衰  
 瑤函寶籙今安在華屋修廊更屬誰狐兔祇看啼故  
 穴風雲那復動靈旌行人下馬譚遺事惟有蒼涼野  
 老知梅園集

南大吉九日游元明宮詩城東三四里鬱有元明宮  
 九日經行近千門窈窕通瑤軒含紫霧琳殿桂丹虹  
 側想當時意經營亦太工瑞泉集

顧夢圭詩崔嵬元明宮宛在城東隅萬夫執畚鍤玉  
 棟金為閭天子謂我兄公卿為我奴傾朝盡側目眇  
 睠天下無誰知原上鷹竟為釜中魚元明今何處白

露滋庭蕪 疵贅錄

按元明宮在朝陽關外新城築後其在城內  
城外父老無能言之者故附于此

日下舊聞卷十八終

日下舊聞卷十八補遺

城市九 存疑

李仲賓行父少孤貧居燕城中荒地多枸杞一日踰隣  
寺頽垣往采杞子日正午方行百餘步忽迷失故道但  
見廣沙莽莽非平日經行境界心甚異之舉頭見日色  
昏猶能認大悲閣爲所居之地遂向日南行循閣以尋  
歸路忽見一壯夫白帶方巾步武甚健厲聲問往何方  
方錯愕間遽以手捽其胸李素多力善搏急用拳捶之  
其人仆已失其首心知爲鬼物然猶跟相向李復以  
拳什之隨什隨起者十餘次其人遂似怒而去旣稍前  
則無首者踞坐大石上以俟意將甘心焉然路所必經  
勢不容避忽記腰間有采杞之斧遂持以前其人果起

而迎之遂斧其頸鏗然有聲乃在青石上其人寂然不見而異境亦還元觀乃私識其處而歸家人見其神采委頓問之則不能語越宿方能道所以遂偕數人往訪其處果有斧痕在石上遂啟其石下乃智井井中皆枯骸也詢之蓋亡金兵亂中死者遂函其骨遷窆他所後亦無他 癸辛雜識

馬祖常祠星天寶宮作教命司諸席元辰集醮筵星君符介壽歲紀輯安躔炬燭天無夜熏焚樹有煙音如緜嶺上升似竹宮前蕊笈祥延世颺輪儼御仙日餘青焯接宿耀薊壇連象緯昭重潤齊明祝大年步虛垂珮響奠幣織文解誠感將馨祀神娛樂鼓淵瀋釐歸帝胄孚祐播農田 田集

忠肅王燾元年元命上王留京師上王構萬卷堂于燕邸召李齊賢充府中迎致文儒閭復姚燧趙孟頫虞集等與之從游以考究書史自娛 東國史略

韓琦紫濛遇風詩草白岡長暮驛賒朔風終日起平沙寒鞭易促障泥躍冷袖難勝便面遮迴嶺卷回雲族破遠天吹入雁行斜土囊微乞緘餘怒留送歸看任擺花 安陽宋

元方輿勝覽大興府載佛寺三十八區中有海雲寺元時寺有千葉杏二株名芙蓉杏傳巖起在京師築清晏堂以此花寘餅中錢唐張叔夏見之稱其奇麗可觀江南所無巖起索叔夏賦之叔夏為填三姝媚詞今失其處故老茂有知之者矣 人海記

張炎三姝媚詞芙蓉城畔侶乍卸邛單衣茜羅重護  
傍水開時細看來渾似阮郎前度記得小樓聽一夜  
江南春雨夢醒簫聲流水青蘋舊游何許誰剪脣  
芳深貯便洗盡長安半面塵土絕似桃根帶笑痕來  
伴柳枝嬌舞莫是孤村試與問酒家何處曾醉梢頭  
雙果園林未暑山中白雲詞

鄆王拜住薨晉王入繼逆臣誅命奉王像祠于海雲寺

黃 公集  
國朝之制凡爲元教師者得在禁近號曰真人給以印  
章得行文書視官府而真大道教者則制封無憂普濟  
開徹洞明真君劉德化之所立也以弟子嗣守其業治  
大都南城天寶宮道園學古錄

袁桶次韵馬伯庸過天寶宮作松暝碧雲深鶴歸人  
倦尋朝回香滿室祠罷月生襟白鳥分山影黃鸝轉  
樹陰小溪流不歇鳴咽似鳴琴清客居士集

契丹主鴻基以白金數百兩鑄兩佛像銘其背曰天後  
世生中國嵩山集

昆田謹按遼於開泰寺鑄銀佛像在重熙二  
十三年當卽晁以道集中所云也

普安禪師至溫於大都作資聖寺道園學古錄

至正二十七年宮牆外長慶寺所掌成宗斡耳朶內太  
澗有龍纏其上良久飛去樹皮皆剝元史五行志

金天眷四年十一月廢劉豫爲河南道行臺傳送燕京  
囚于栢王寺竊憤續錄

永祜陵諱聞洪皓北鄉泣血旦夕臨後遇諱日卽燕山  
開泰寺爲文以薦其略曰故宮爲禾黍改館徒領于秦  
牢新廟游衣冠招魂但歌于楚些雖置河東之賦莫止  
江南之哀遺民失望而痛心孤臣久繫而嘔血又云盛  
德之祀傳百世以無窮在天之靈繼三后而不朽故臣  
讀之無不掩涕

洪忠宣公行狀

張甫者本金元帥封高陽公金亾河北甫據雄霸元將  
俚砦奴屢欲滅甫以取雄霸驍將窩羅虎者歸甫甫納  
之其後窩羅虎遁去且竊甫千里馬以獻俚砦奴俚砦  
奴喜待遇益厚嘗會飲燕京之大悲閣窩羅虎醉俚砦  
奴而推使投閣斃焉窩羅虎乃佯醉下樓復乘所獻  
馬以歸甫追者莫及人始服甫之用間焉

宋史

舊有開泰寺王沂公謂是遼魏王漢寧所建元王憚  
秋澗集中載重修開泰寺功德疏亦曰迺眷燕山昔爲  
遼府開泰禪寺者爰因鄴第建自樞臣然遼史宗室初  
無魏王漢寧傳也

鴻雪錄

王憚同長老金燠義方暨馮君用聶文超劉敬臣王  
仲通馬才卿石壽之座王賈君叔良會飲開泰丈室  
詩陔殿秋烟老檜蒼春風合座捲吟觴爭傾底裏心  
能見不恡歌呼興更長風調愍輸韋曲杜新詩驚絕  
碧雲湯人生無似新知樂安得車輪一夜方

秋澗集

又秋日宴廉園清露堂和韻詩何處新秋樂事嘉相  
君絲竹宴芳華高雲錦席翻涼吹翠蓋紅粧簇藕花  
照眼東山人未老舉頭西日手頻遮賓筵醉裏聞佳

語喜動金杯五色瓜同上

平章張侯遂初亭館每歲春例一讌諸公同上

王惲遂初亭詩山林長往懷高致富貴逼人將奈何

閑向遂初亭上去一樽高詠紫芝歌同上

又宴張右丞遂初園水調歌頭詞園林足佳勝鐘鼓

樂時康去天尺五韋杜此日漢金張誰似主人好客

暫趁金華少暇樽俎共徜徉三館儘英雋簪履玉生

光眺東臺登北榭燕南堂露涼玉簪零亂竹靜有深

杳醉聽新聲金縷愛仰東山雅量清賞興何長高詠

遂初賦松柏鬱蒼蒼同上

真常真人李居壽召赴闕下特旨於奉先坊創太一殿  
福萬壽宮中建齋壇繼太保劉秉忠裡六丁神符歲給

道眾粟帛有差同上

王惲太一宮絕句庭樹蕭蕭綠滿廊日長深鎖

涼隔簾遙見秋來處一葉輕黃墜井牀又庭松

偃蓋青一聲幽磬隔疎櫺多應金簡朝元罷自炷爐

香讀道經同上

大都玉馬坊耿氏石獅猛木出如霧予時為御史目覩  
其事狀出微賤而遽當台鉉此驟得不祥之極也同上







